

1 Samuel

Samuel Non Saúl Non

Davidhuunoa Cununi Cuscan

Nocon Ifo Diosin ainfo ahuun anu Ana facu inanni

1 ¹Nantian nocofunun ipaoni ahuun anu Elcana machifo Efraín nan pushu rasi ahuun anu Ramá ano ica ini. Nan Elcana apa Jeroham ahuun shota Eliú. Nan Eliú apa Tohu. Nanton apa Zuf ini. ²Elcana ahuin rafuya ini. Aton anu rafu Ana yafi Penina. Nan Penina facuya ini. Ascano Ana toosma ini. ³Nan faritifi Elcana pushu rasi ahuun anu Silo ano capaoni. Nannoshon nocon Ifo Diosin ahuamamishti huatiro cuscan cufinfain ahuara Diosi inain cuscan. Nanno Silo ano Elí furun rafu Ofni yafi Finees aton caifohuunoa nocon Ifo Diosi cufinmisifo ini. Elí arifi ahuun caifo Israelifohuunoa nocon Ifo Diosi cufimisi ini.

⁴Ascano nocon Ifo Diosin yononi cuscan Elcana nocon Ifo Diosi nami inaintian ahuun ahuin Penina non furunfo non ainfacufori inanni. ⁵Nan ahuin futsa Ana Diosin yononi cuscan toosma. Elcana fasi ahuun noicoinquin nami paratama inanni. ⁶Ascano nan ahuin futsan Penina fasi Ana cashumutsama huapaoni. Yoiqui isca

huapaoni, —iAicho! Unfin facuyaquin mincai facuyamaran, —ishon fasi cashumutsama huaquin fucash huapaoni. Ahuun no muran fasi shinanchacamapaoni.

⁷Faritifi nansca huapaoni. Ana ahuun funu fu Diosin ichananti pushu ano caiton ahuin futsan Penina aqui cashu mutsamapaoni. Aqui nanscaiton oiniquicai Anapan uaiqui piinima.

⁸Ascaiton oinquin funun Elcana yocani, —¿Manshtan, ahuuscai uaiqui min piamamun? ¿Ahuuscai min shinanchacaimun? Un fasi minhuun noi. Asca un mia noiyai cuscan fasi shara. Non mucu rafuti facuyafishon un mia noiyamaino nancai min ahuama, —ishon Elcana ahuin yoini.

⁹Ascano fari futsa Silo anoshon piquin unutan Ana funicaini Diosin tsainti pushu ano cani Diosi cufinshquin. Ascano nanno ahuun caifohuunoa nocon Ifo Diosi cufinmisi. Nan Elí Diosi cufinmisiton arifi nanno ichananti pushu shoi caincaiti ano tsaoshon oinni.

¹⁰Ascano Ana nocon Ifo Diosi cufiaintian ahuun nomuran fasi uaicoinni. ¹¹Nan cufiaintian Anapan nocon Ifo Diosi yoini isca huaquin, —Ifo

Diosin, min ahuamamishti huatiro. Unfin min oinmatiquin. Un omitsiscai cuscan ua shinahuun. Ua furonanfacu inanpun. Mian furonanfacu inainton un chipo mia inanshquin mina inon. Nan niyoatian uhuun facu min oinmati ishquin. Ascacun nanfin mina ishquiquin ahuun foocai tustupacunacamaran, —ishon Anapan nocon Ifo Diosi cufinni.

¹²Anapan ahuun nomuranshon cufiainton Elí ahuun ashfa oinni. ¹³Ahuun ashfa nan tsainqui cufancufan ifiaitocai ahuun oi nicanima. Ahuun nomuranshon nocon Ifo Diosi cufinni. Ascan Elí shinanni —Na ainfo pauinran, —ishon shinanni. ¹⁴Ascaiton Elí Ana yoini, —¿Ahuuscai min nuno pauin oamun? Min fimi unu paun potahuun, —ishon yoini.

¹⁵Ascaiton Anapan cumani, —Niaifo, uncai pauinma. Unfin fasi shinancoinquin. Nan un shinain cuscan un nocon Ifo Diosi yoia. ¹⁶Uhuunoa shinanchacayamahuu. Uncaiyainfo chacama. Uhuun nomuran un fasi omitsiscai cuscan un nunoshon nocon Ifo Diosi cufin oaran, —ishon yoini.

¹⁷Ascaiton Elí cumani isca huaquin, —Ascacun afanan shinanchacayamahuu. Min Israelifoan Diosi cufian cuscan mia ashopainonran, —ishon Elí yoini.

¹⁸Nannori yoiaiton nicatan Anapan Elí cumani isca huaquin, —iAicho! Mian cumashararan, —ishon yoitan cashon piini. Afanancai Anapan shinanchacanima. ¹⁹⁻²⁰Ascan iyoconaino nocon Ifo Diosi cufinnifo. Cufinqui unutan Elcana ahuun yorafoya aton pushu Ramá ano nasonifo. Nocotan Elcana Ana fu oshani. Ascano man facu nanua ini. Taui furonanfacu cainni. Ascashon Anapan yoini isca huaquin, —Un nocon Ifo Diosi cufian cuscan ua

furonanfacu inan. Ascacun ahuun anu Samuel iishquinran, —ishon yoini.

²¹Ascano chipo Elcana ahuun yorafoya afanan Silo ano cani nocon Ifo Diosi ina inanfain a yoia cuscan huaashquin. ²²Ascafiacai nan ahuin Anacai a fu canima. Yoiquin isca huani, —Manshtan, un natian mi fu cayoicaima. Nan nocon facu shoma unuaitian un mi fu cashquin nocon Ifo Diosi un noco facu inanfin a fu ipanacaquin, —ishon yoini.

²³Nannori nicatan Elcana cumani, —Min shinain cuscan min atiro. Ascacun nituyohuun afanan nocon facu shoma ayamaino nocon Ifo Diosi mia yoia cuscan mia ashopainonran, —ishon yoini.

Ascano Ana ahuun pushu ano nituyoni ahuun facu shoma ayoaitian. ²⁴Ascano nan ahuun facun afanan shoma ayamaino ichananti pushu ano nan nocon Ifo Diosi cufimisifo ano furun iyon. Moi funu ahuun fari rafu non fustiya iyofain harina veintidós litro fofain fimi unu fichi tutso muran foni.

²⁵Ascashon moi funu rutushon Diosi inanquin unutan ahuun facu Elíqui iyonifo. ²⁶⁻²⁷Ascano Anapan yoini, —¿Niaifon Elí, mian shinainmamun? ¿Man mianmun ointiaquimana? Unfin icon mia yoicain. Fari futsa min nuno ica ini. Urifi un nuno mia chaimashta ishon nocon Ifo Diosi cufini. Un nocon Ifo Diosi cufini cuscan ua na facu inan.

²⁸Ascano un natian nocon Ifo Diosin uhuun facu inain niyoatian ahuun oinmati inonran, —ishon yoini. Nan nicatan Elí Upa Diosi cufini.

Anapan fasi unimacoinquin nocon Ifo Diosi cufini

2 ¹Ascan Anapan nocon Ifo Diosi cufinquin isca huani, —Uhuun nomuran un Diosiqui fasi unimacoin.

Uhuun Ifo Diosin ua fasi shara
hua.
Ifon mian numa. Ascan un miqui
unimacoin.
Mian numa cuscan ua noिकासmaifo
un yoisharatiro.
² Tsoa futsacai mia cuscara
sharacoinma.
Mirus fusti min noco Numamisi.
Mirus fusti min ahuamamishti
huatiro.
Toquirininhuancai tsoan
shucatiroma.
Nanscarifi ai min nocon Diosi min
acai cuscacai tsoan mia nitu
huatiroma.
³ Cacapaimisifoan, “Uncain tsoa futsa
cuscarama.
Tsoan ua finontiomaran,” ishon
shinanyamacahuun.
Afanan tsain curafiapaimisi cuscara
yoyamacahuun.
Nocon Ifo Diosin man amisi cusca
tapicoian.
Man amisi cuscanhuunoa mato
onaintimatiro.
⁴ Futsan futsafo finoncoinpaoni
natiancai afanan finontiro.
Ascano futsafocai curush
iyopaonima natian mutsisipa
sharafo.
⁵ Nan futsafo ahua yopapaonima
natian fonicoi.
Ascan futsafo fonicoiipaoni
natian mayancoianfo.
Ainfo toosma natian siete facuya.
Ainfo futsan facu ichapaya ipaoni
natian afanan facu nanutiroma.
Ascashucaí shafatifi unimaima.
⁶ Nocon Ifo Diosin yora namatiro
iyamarai ato nimatiro.
Futsa namatiro mai huanon
iyamarai futsafo funimatiro.
⁷ Nocon Ifo Diosin futsa ahuuoma
imatiro

futsa ichapa inantiro ahua
yopaima.
Ascan curafiapaimisi shatumatiro
ahuama tapishquin.
Futsa ahuuoma nocon Ifo Diosin
niaifo imatiro ahuunoa
shinansharanonfo.
⁸ Futsafo ahuuoma omitsiscaino
nocon Ifo Diosin ato numatiro
ahua afanan yopatiroma
niaifo cuscaran iishquicani.
Ascan atohuunoa yoisharashcani.
⁹ Tsoan nocon Ifo tanasharaiton ato
cushusharai
raquira caiton nanri cushusharai
ahua chaca finonnonma.
Ascafia yora chacafo nashu faquish
muran ipanacafo.
Tsoacai afin ahuun
curushhuunoa
isharatiroma.
¹⁰ Tsoan nocon Ifo Diosi
noिकासmaquin aqui chaca
huaiton
Diosin ato omitsiscamacoin.
Diosin nan icanoshon ahuun tsain
curush
turuica nicatsa ato
shatumashquin.
Nocon Ifo Diosin nantifi manifoti
anoafo
ato yoipacushquin isharamisifo
iyamarai chaca huamisifo.
Nan Diosin catoan fusti ato niaifocoin
iishquin. Diosin ahuun curush nan
niaifo inain. “Nanfin mato niaifocoin.
Uhuunshon mato iquiniran,” ishon
nocon Ifo Diosi nan niaifohuunoa
nantifi yorafo yoishquiran, —ishon
Anapan cufini.
¹¹ Ascan cufintan Elcana yafi Ana aton
pushu Ramá mai ano nasonifo. Ascan
Samuel Elí nan Israelifohuunoa aton Ifo
Diosi cufinmisi fu nituaino apa yafi
ahua fu nasonima. Shafatifi ichananti

pushu muran nocon Ifo Diosi
yonopaiyai cuscan Samuel huashomisi.

Elí facufoan fasi Israelifo chaca huani

¹²Ascatan Elí furufo fasi chacamisifo. Nocon Ifo Diosí nicacasmamisifo.
¹³⁻¹⁶Nocon Ifo Diosin ato yononi cuscaricai shinannifoma. Diosin yononi cusca Israelifoan aton inafu Dios fu tsainti pushu ano iyoní nannoshon ato rutushcaquin. Nansca huacashon ismanifo aton chaca shatupaiyai cusca nocon Ifo Diosi tanasharashcaquin. Ascato nan ina rutushon ahuun shuni toquiri putsamuinia camaquishon coanifo. Nantianri ahuun nami pichanfo cofini. Ascafia futsan nan shuni coataima non namiri cofinsharataima Elí facufoan aton oinmati nichini ato nami fushonon. Ahuun nami chachiti uhuapaton nan ahuun nami chachishon Elí facufo fushoni ato pimanon. Ascato nan ina ahuun ifoan nan oinmati yoiquin isca huani, —Nocon Ifo Diosin tsain cununi cusca nan shuni coataima nami non pitiromaran ishon noco yononi. Ascan oinyoquin. Nan shuni coano min apaiyai cusca min nami fitirotan, —ishon nan inapan ifoan yonomati yoini. Nannori yoiatton nicaquin yonomatinin curushcain cumani isca huaquin, —Ma. Natian ua inanhuun. Elí facu rafutancai nami cofian fipaima. Ascacun mian natian inanrisca huayamaiton un curushcai fitirotan, —ishon cumani. Nanscarafofin Elí facu rafu nan aton caifo Israelifo chaca huamisiifo ipaonifoquin. ¹⁷Aton Ifo Diosin yononi cuscan futsafoan aton ina Diosi inanpaiyai cuscan nan Elí furu rafutan shinannifo acai ahuama. Ascacun Elí furu rafutan apaonifo cuscan nocon Ifo Diosin oinni fasi chaca huaifoan.

¹⁸Ascan Samuelcai Elí facufo cuscarama. Nocon Ifo Diosin Samuel

amapaiyai cuscan huani. Ascatan Israelifohuunua nocon Ifo Diosi cufinmisifoan sahuumisi cuscaran nanscaracoinri Samuel sahuumani. Sahuuti ahuun anu lino sahuuni.
¹⁹Ascato faritifi Ana ahuun funu fu ichananti pushu ano focashon ina rutushon ismanifo aton chaca shatupaiyai cuscan nocon Ifo Diosi tanasharashcaquin. Cataima Anapan ahuun facu Samuel sahuuti icushushoni inanshquin. ²⁰Ascatan Elí Anapan funu Elcana yoisarani isca huaquin, —Min ahuin Anapan Diosi cufini facuyashquin. Ascan ahuun facu cainyaitian Ana nocon Ifo Diosi facu inanni. Ascatan min ahuin Ana nocon Ifohuunshon mia facu ichapa inanpainonran, —ishon Elí yoini. Ascatan Elcana yafi Ana aton pushu ano nasonifo. Apa yafi ahuana soaifono Samuel Elí fu nituni. ²¹Ascan nocon Ifo Diosin Ana shara huani furonanfacu rafu non fusti inanfain ainfacu rafuri inanni. Nantianri Samuel nocon Ifo Diosi apaiyai cuscan huashopaoni.

²²Nantian Elí fasi anifoshtafashon tapini ahuun furu rafutan fasi chaca huaifoan. Nantianri shomayafoan ichananti pano pushu shoi caincaiti ano futsafo ahuana huashomisi. Nanno Elí ahuun facu rafu nocotan nan ainfo shomayafoya oshanifo. Asca furun rafutan asca huaifon Elí tapini.

²³Ascaifoan Elí ahuun facu rafu yoini isca huaquin, —Nantifi noco yorafoan ua yoiatton man rafutan fasi chaca huai. ¿Ahuuscai man chaca huafafainnimun?

²⁴Uhuun facu rafutan unucahuun.

Nocon Ifo Diosin ahuun yorafo matohuunua yoiatton cuscacai sharama.

²⁵Futsan futsa chaca huaifon Diosin afanan shinanmasharatiro futsa rau huanon. Ascafia futsan nocon Ifo Diosi chaca huaifon tsoa futsacai nocon Ifo

Diosi yoitiroma chaca hua cuscan rau huanon, —ishon Elí ahuun facu rafu yoini. Ascafiainocai apan ato yoini cuscan nicapaicanima. Elí ahuun facufo yoiataima nocon Ifo Diosin shinanyoni ato namashquin.

²⁶Ascashu nan furonanfacu Samuel yosisharani. Nocon Ifo Diosin oiain cuscan yorafoanri oinnifo Samuel furonanfacu shara ini. Ascacun ahuunua yoisharanifo.

²⁷Nantian nan nocofunun nocon Ifo Diosi tanasharacoian Elíqui nocoshon yoini isca huaquin, —Nocon Ifo Diosin mia yoia isca huaquin, “Min shunifo Egipcio ano aton yonomatifo icaitian un ato uhuunua tapimani. ²⁸Un min shuni Aarón catonni min yorafohuunua ua cufifain toquirifo putsamuinia anoshon inin shara uhuunua coafain uhuun ointaifin un yonoa cuscan sahuuti futsafo sahuunon. Un yononi min caifoan ua ina inainton min shunifo nan Leví ahuun funafo nan inafu ua inanon. ²⁹Un ato nanscara shara catonni. Ascan ahuuscai uhuun yora Israelifoan ua inafu yafi ahura futsafo ua inainton min shinan afocai ahua. Min facufihuunua min shinan cusca min uhuunua nannori shinansharaima. Min caifo ua inanpaiyai cuscahuunshon min facufo non minrifi man pia man fasi shoacoian. Nan nami sharacoinfin man fimisiquin piishcaquin.

³⁰“Un yoiyoni cuscan min non min yorafo non min shunifori man Israelifohuunua ua cufinshomisiso cuscacai unupacunacama. Ascafia man fasi chaca huahuunshoncai man afanan mato caifo Israelifo ua cufinshomisi itiroma. Un natian shinan futsa. Tsoan futsafo uhuunua shinanmasharacun urifin atohuunua futsafoan ointaifi un yoi sharashquin. Ascan tsoan uhuunua futsafo shinanmasharayamaiton urificai

atohuunua un shinansharatiroma.

³¹Ascashon mia non min yorafori un mato shatumashquin afanan mato yorafohuunshon ua cufinshomisi man inonma. Nantifi min yorafo nai futsushquin. Tsoacai anifoshquima.

³²Minfin oincai min caifo futsafo un ato shara huashoshquiai cuscan. Min oinquin yoishquin isca huaquin, ‘Ohuashta uhuun caifofo nocon Ifo Diosi shara hua cuscan ua shara huashoamaran,’ ishon min yoishquin. Min yorafo murancai afanan anifo ipanacama. ³³Nan min yorafo tushuafo fasi omitsiscai aton nomuran shinanchacashquicani. Min funafo pushcoaitian ato rutushquicani.

³⁴Ascano min facu Ofni yafi Finees nan shafa fustiton nan rafu nai. Ascaiton min tapitiro un natian mia yoia cuscan nantifi iconcoin. ³⁵Ascatan un Israelifo cufinshomisi futsan catoin ua tana sharacoinon. Uhuun nomuran un shinain cuscan arifi nannori shinanon. Un nan yonoai cuscan huanon ahuun shunifori un shara huashoshquin nan aton niaifo un catoanton ato yonosharashquin. Nanfoan aton caifofo ua cufinshomisiso ipanaca. ³⁶Ascano min funafo aqui fuopacufoancatan nan yoishquicani isca huaquin, ‘Nocori yonomapun non nocon caifohuunshon mia cufishomisi inon. Non ato futan yonoshon norifi piisharanon,’ —ishon yoishquiaifo cuscan nocon Ifo Diosin Elí yoini.

Nocon Ifo Diosin Samuel cunani

3 ¹Ascano nantianri nan furonanfacu Samuel Elí yononi cuscan huashoni. Nanscahuahuunshon Samuel nocon Ifo Diosi ashomisi. Nantiancai nocon Ifo Diosin ahuun tsain tsoan tapiyonima. Fusti rasiton ahuun tsain nicanifo. Aton namapanhuunshon Diosin ato

tapimapaiyai cuscan fusti rasi tapinifo.

²Ascan yamu futsa Elí ahuun racati ano racani. Ahuun furo afanan oinsharaima.

³Elí yafi Samuel Diosin tsainti pushu muran icafoanno aton farocai nocatai inima. Nantian Samuel nocon Ifo Diosi fu tsainti pushu muran racani. Diospan casho a muran ahuun tsain nanuni Samuel chaimashta raca ini. ⁴Samuel nanno racano nocon Ifo Diosin cunani.

“Samuel,” huaiton.

“Unquian. Unfin nunoquin,” huatan.

⁵Funinacahuan Elí racano ichoni. —Min ua cuna. ¿Ahua min yopaimun? —ishon yocaiton.

—Ma. Uncai mia cunama. Caashu racatahuun, —ishon yoini. Ascano afanan caashu racani. ⁶Ascatan afanan nocon Ifon Diosin Samuel cunani, “¡Samuel!” huaino. Afanan funinacahuatan Elí racano cani. Ascatan afanan yoini,

—Min ua cuna. ¿Ahua min yopaimun? —ishon yocaiton.

—Uhuun facushtan, un mia cunama. Caashu afanan racatahuun, —Elí huani.

⁷Nocon Ifo Diosincai Samuel cunayomisima. Ascano ahuun oiricai nicayamafain acai onantaima ini.

⁸Ascatan afanan nocon Ifo Diosin Samuel cunaino funinacahuan Elí racano afanan cani. Ascashon yoini, —¿Mian cunamun? —ishon yocaiton.

Nantian Elí tapirisca huatani nocon Ifo Diosin nan furonanfacu Samuel cunacun. ⁹Ascashon afanan yoini,

—Afanan caashu racatahuun. Nocon Ifo Diosi mia afanan cunaiton cumaquin isca huahuu, “Unquian, Ifon. Ua yoihuun un mia nicanon,” —ishon yoihuun. Ascano Samuel afanan ahuun racati ano racani. ¹⁰Ascano afanan nanscari huaquin nocon Ifo Diosin aqui oshon cunani, —¡Samuel! ¡Samuel! —huaiton, —Unquian min oinmati. Ua

yoihuun un mia nicanon, —ishon cumani.

¹¹Ascashon nocon Ifo Diosin Samuel yoini isca huaquin,

—Un samamashta Israel mai ano acai cuscan nicacani fasi ratucoinshquicani.

¹²Un Elí yoia cuscan un huashquin. Nan non ahuun yorafo fasi omitsiscashceni.

¹³Munfin yoimisiquin ahuun facu rafutan ua chaca huafiafoancai ato yoipaimisima. Nanscacufin un ahuun yorafoya ato onaintimacoincain.

Nanfocai afanan ato caifohuunoa ua cufinshomisifo ipanacama. ¹⁴Un yoimisi cuscacai un fianananpacunacama. Elí non ahuun facu rafutan ua ina rutushotiro ua ahua futsa inanpaifiafoancai un aton chaca rau huashopacunacamaran, —ishon nocon Ifo Diosin Samuel yoini.

¹⁵Nan nicatan afanan Samuel nanno racani nan shafai chain. Ascashu funamari nocon Ifo Diosi pushu shoi caincaiti ano fupushoni. Nocon Ifo Diosi yoia cuscan Samuel ratuquicai Elí yoipainima. ¹⁶Ascatan Elí Samuel cunaquin isca huani,

—Uhuun facushtan, Samuel, —huaiton. —Unquian nuno, —ishon cumaiton.

¹⁷—¿Nocon Ifo Diosin mia raquiri yoiamun? Nantifi ahuun tsain ua yoihuun. Mian fomainton nocon Ifo Diosi mia fasi onaintimapainonran, —ishon yoini.

¹⁸Nannori Elí huaiton nicaquin nan nocon Ifo Diosin yoia cuscan Samuel nantifi Elí tapimani. Ahuashtacai fomannima. Nan yoiaiton nicaquin Elí yoini isca huaquin, —Naanfin nocon Ifoquin. Nan shinan cuscafin sharaquin. Nantofin nan apaiyai cuscan huatiroquin, —ishon Elí Samuel yoini.

¹⁹Nan Samuel yosiatián nocon Ifo Diosin a fu ipaoni. Nocon Ifo Diosin

Samuel inonpacoai yoini cuscan nanscaracoin finonni. ²⁰Ascano nantifi Israeli maifoti icafoan yoinifo isca huaquin, —Samuel Dioshuunshon noco yoimisi. Noco yoimisi cuscan huamisirán, —ishon ahuunoa yoinifo.

²¹Nan Silo pushu rasi ano Diospan ichananti pushu muran nocon Ifo Diosin Samuelqui nocopaoni ahuun tsain tapimashquin. Ascano nocon Ifo Diosin Samuel tapimani cuscan ahuun caifo Israelifori tapimapaoni.

Diospan tsain nan casho murannoa Filisteofoan finifo

4 ¹Nantian Filisteofo fu Israelifo rutunannifo. Ascano Israelifoan aton ranushumuafu Eben-ezer ano iyonifo. Ascano nan Filisteofoan aton ranushumuafu Afec mai ano iyonifo.

²Ascano nantian Filisteofo Israeli icafoanno nocoriscatanifo. Ascashon ato rutunifo. Cuatro mil Israeli ranushumuafu Filisteofoan ato rutunifo.

³Rutunain unucatan Israelifo afanan nan icafoanno nasonifo. Nantian aton niaifofu yocanonannifo, —¿Ahuuscaimun nocon Ifo Diosin noco cushuamaquin Filisteofoan noco rutunonfo? —icashu yocanonannifo. Ascatan yoinifo isca huaquin, —Nan Silo anoshon Diospan casho ahuun tsain a muran noco fushononfo. Nan non Filisteofo fu rutunaintian nan casho non fotiro. Nanton noco numanon nan nocon noicasmaifoan noco ahuusca huanonfoma, —ishon yoinifo.

⁴Ascashon nocofunufu Silo ano nichinifo Diospan casho ahuun tsain a muran ato fushononfo. Nan nocon Ifo Diosin ahuun curushhuunshon noco ahuamamishti huashotiro ahuun nai oinmati rafu aton ointsa rami huacashon nan casho camaqui ocuma rafu nimanifo. Nan nocon Ifo Diosin

arifi nanno ini nan casho ano. Ascano Elí facu rafu Ofni yafi Finees nocon Ifo Diosi ahuun casho ano inifo. Nan casho muran Diosin Israelifo cunushoni cuscan nanunifo. ⁵Ascano nan casho atogui nocoafono Israelifoan fasi unimacani oi ashcafinin cunariscatanaifono mai nayanaiyaiquin mutsa. Nan nii uhuapacoin pacua mutsa muunifo.

⁶Nantian Filisteofoan nicacaquin yoinifo isca huaquin, —¿Ahuuscai nan Israelifo (aton anu futsa Hebreofo) icanoafu fasi mucacanimun? —icashu yocanonannifo. Ascaiton futsan ato yoini nan Israelifo aton Ifo Diospan casho atogui nocoano icaniran ato huani. ⁷Nan nicacani fasi ratucoinnifo. Yoiquin isca huanifo, —¡Ohua! Israelifo icano aton Diosi futsa noco. Natiafin non ahuara chaca finoincain. Ascara ahua tsoan oinyomisima cuscara. ⁸¡Ohuashta! ¿Nonmun ahuuscatiroquin? ¿Tsoan noco numatiromun? Nan icafoanno aton Diosin curushcoin noco. Nan Diosi tsoa istaipama anoshon Egipciofo pau isincain fuchimanano nai futsunifo. ⁹Uhuun caifofu ratuyamacahuun. Filisteofoan mutsisipainifoancahuun. Non atogui ratuaino nocon rutuqui finoanfoanno non na Hebreofo yonomatifo itiro. Ascacun non ato rutuicanon, —icashu yoinannifo.

¹⁰Nantian afanan Filisteofo fu Israelifo curushcain rutunannifo. Ascano ato rutuqui finaifoan oin Israelifo nan icafoanno aton pano pushu rasi ano ichonifo. Filisteofoan ato ranushumuaton Israelifo ichapacoin rutunifo. Trienta mil Israeli rutunifo.

¹¹Diospan casho Filisteofoan fiinifo. Elí facu rafu Ofni yafi Finees nantianri rutunifo. ¹²Ascano nan nocofunufu Israeli mani futsa Benjamín ahuun funa

nan rutunainfoannoashu ichoni. Ascashu Silo ano noconi. Nocoaiton oiainfono ahuun sahuuti fashnu fashnu ani mai mapori ahuun mapo camaqui masaica ini. ¹³Israeli icanoashu Benjamín ahuun funa nocoaitian Elí fai cusumunri tsaonshon oinni. Fasi ratuquin shinanni ahua chaca nan Diospan casho finoanmainquin. Ascano nan nocofunu nocotan Israelifoon finoan cuscan ato tapimani. Nan nicacani nantifi pushu rasi anoafoan fasi oiashcafinin ato manocani uainifo. ¹⁴Ascatan nan nicaquin Elí ato yocani, —¿Ahuuscai man fasi uaiquimun? —ishon yocani.

Ascano nan nocofunun Elí tsao ano ichoni. ¹⁵Elí ahuun fari noventa y ocho fariyatiancai afanan ointiro inima. ¹⁶Ascano nan nocofunun oian cuscan Elíqui chanini. Yoiquin isca huani, —Nan rutunainfoannoashu un ramashta noco. Na shafata un rutunainfoannoashu un ichoaran, —ishon yoiaiton.

—¿Uhuun facushtan ua yoihuun ahua finoanmun? —ishon Elí yocaiton.

¹⁷—Filisteofoan nocon caifo ichofain nocon caifo ichapacoin rutuafo. Min facu rafuri Ofni yafi Finees man rutuafo. Ascano nan Filisteofoan Diospan casho man fiaforan, —ishon yoini.

¹⁸Nan Diospan cashohuunoa yoiaiton nicain Elí ahuun tsaoti pushu rasi shoi caincaiti anoashu manansca pacuni. Anifocoinfiashu fasi ihuucuin ini. Nanscashu pacui tutucumutan naani. Naanfin Israelifoon aton niaifo cuarenta fari ipaoniquin. ¹⁹Ascano nan Elí ahuun facu Finees ahuun ahuin facu nanua cainti sunuin. Nan ainfoan nican Filisteofoan Diospan casho fifain Elí fafahuan man naa ahuun funu man rutuafo nicaino nan samamashta facu isinhuani afanancai tunutiro inima.

²⁰Ascano nan ainfo naiton ainfo futsan a fu icaton yoini isca huaquin, —Ratuyamahuun. Natian min furonanfacuyaran, —ishon yoini. Ascafia nan ainfoan yoiain cuscacai futsa cumanima. Afanancai cumatiro inima. Man naaquin. ²¹⁻²²Ascan nataima yoini isca huaquin, —Filisteofoan Diospan casho fifain uhuun fafahuan yafi uhuun funu man naa. Afanancai nocon Ifo Diosin Israelifo fu icama. Nanscaquicai afanan ahua shara noco mai ano itiroma. Ascano uhuun facu ahuun anu Icabod iishquinran, —ishon yoini.

Samuel Israelifo aton niaifo ipaoni

7 ³Nantian Samuel nantifi Israelifo yoini isca huaquin, —Iconmainquin man nocon Ifo Diosiqui nasocioianmainquin caifo futsafoan aton diosfo rami huafo potacahuun. Nan rami huafo ahuun anu Astarté ointsafon nantifi potacoincahuun nocon Ifo Diosi mato amapaiyai cuscan huaashquin. Nan fusti ifohuacahuun. Man nanscaiton nocon Ifo Diosin mato numai Filisteofoan afanan mato ahuusca huanonfoma, —ishon Samuel ato yoini.

⁴Nan nicacatan Israelifoon Baal ointsafon rami huafo cuscan potafain Astarté ointsafon rami huafo cuscan potanifo nocon Ifo Diosi fustiton ato amapaiyai cuscan huashoshcaquin. ⁵Afanan Samuel Israelifo yoini isca huaquin —Uhuun yorafoan, nantifi Mizpa mai ano uqui fucahuun un mato nocon Ifo Diosi cufinshonon, —ishon Samuel ato yoini.

⁶Ascano Samuelqui fucashon unu fishon maiqui ocanifo nan chaca huafo cuscan shatufain nan nocon Ifo Diosi fusti tanapaiyaifo cuscan ismanifo. Nan shafatari piqui tununifo nocon Ifo Diosi cufinyanan yoiquin isca huanifo, —Upa

Diosin, min nocon Ifo non mia chaca huamisirán, —ishon cufinnifo. Nantian Mizpa mai ano Samuel Israelifo aton niaifo ini. ⁷⁻⁸Nanscaifoan Filisteofoan nicaní Israelifo Mizpa ano ichanainfoan. Ascashon aton niaifofoan aton ranushumuafó ichanan huani Mizpa mai ano focashon Israelifo rutunonfo. Nan nicacani Israelifo ratucoinnifo. Ascashon Samuel yoinifo isca huaquin, —Nocon Ifo Diosi noco cufishonfainhuun Filisteofoan noco ahuusca huanonfoma, —ishon Samuel yoinifo.

⁹Ascano Samuel chashoanun facu rutuni toquirifo putsamuinia camaquishon coani. Ascashon Samuel Israelifohuunshon nocon Ifo Diosi cufiain cuscan nocon Ifoan nicaní.

¹⁰Ascano nan Samuel chashoanun facu coaino Filisteofo atoqui chaimashta funifo Israelifo rutupai. Ascafia nantian nocon Ifo Diosin nai turuimaqui fasi achacoin huaítan nicain Filisteofo fasi ratucoincani ichonifo. Ascaítan oincaquin Israelifoan ato mufaintan atirifi Filisteofo ato rutunifo. ¹¹Nan Mizpa mai anoshon Filisteofo mufaincatan Israelifoan ato rutunifo Bet-car chaimashtashon ato rutunifo. ¹²Ascatan nocoafono Samuel toquiri uhuapa nan Mizpa yafi Sen nushmancayan nichini. Ascashon nan toquiri nichimua anuni Eben-ezer onicoinnin tsainman yoia —Nantian nocon Ifo Diosin noco cushushararan, —ishon Samuel anuni.

¹³Ascan nan Israelifoan Filisteofo ichoanfoannocai afanan Israeli mai ano funifoma Israelifo rutupai. Samuel niyoatían nocon Ifo Diosin ahuun curushhuunshon Filisteofo nitumani afanan Israelifo fucash huanonfoma. ¹⁴Ascano nan Israelifoan Filisteofo ichoni aton mai fianshcaquin. Ascano

nan pushu rasi Ecrón chaicoín pushu rasi Gat ano Filisteofoan Israelifo nasonifo afanan atona inon. Ascano nan mai futsafo chaimashtari Israelifoan Filisteofo nannoshon potanifo afanan ato yonononma. Nantiancai Israelifo fu Amorreofo afanan rutunanpainfoma.

¹⁵Ascan nan Samuel niyoatían Israelifoan aton niaifo ipaoni. Ascashon ahuuscatorofomainquin Samuel ato tapimani. ¹⁶Ascashu faritifi Samuel cahuacacaipaoni Betel mai ano non Gilgal mai ano non Mizpa anori cani ahuara Israelifoan finoainfo cuscan ato yoisharaicai afanan shinanchacanonfoma. ¹⁷Ascano ato yoiquin unutan pushu rasi Ramá ano Samuel nasoni. Nanno ahuun pushu ini. Nannoshori ahuara finoan cuscan ahuun yorafo tsain shara yoini afanan shinanchacanonfoma. Ascashon Ramá ano toquirifo putsainini anoshon nocon Ifo Diosi cufishquin.

Israelifo nan caífo futsafo ica cuscan arifi niaífoypainfoma

8 ¹Nan Samuel anifoaitían furunfo catonni Israelifo yonononfo. Nanfori Samuel cuscara inonfo. ²Samuel ahuun facu iyoa ahuun anu Joel. Chipocuton ahuun anu Abías. Nan rafutan pushu rasi Beerseba ano ato yononifo. ³Ascafia furunfocai apa cuscara inima. Samuel nocon Ifo Diosi tanashara cuscacai ahuun furun rafutan huaafó inima. Pui fusti shinanquin futsafo fomannifo pui paratama fiishcaquin. Futsan ato yoiquin isca huani, —Un futsa chaca hua cuscan man yoićuma un mato pui inainran, —ishon yoiaiton nan Samuel furun rafutan nan pui fiinifo. Ahuara iconmafia nanscara yoinifo. ⁴Ascacatan Israeli niaífo patasharinoafó ichanannifo. Ascashu Samuelqui Ramá

ano fonifo. ⁵Aqui nococatan yoinifo isca huaquin, —Min natian anifoshta. Min noco shara huapaoni cuscacai min facu rafucaí ascarama. Nan rafutacai nocon Ifo Diosi tanafoma. Ascacun nan caifo futsafoan aton niaifo cuscaran catonhuun noco yononon, —icashu Samuelqui chaninifo.

⁶—Noco niaifo futsa catonshohuun noco yononon, —ishon Samuel yoinifo. Nan nican Samuel ahuun nomuran shinancoinni. —Ascaracai sharamaran, —ishon shinanni. Ascashon nocon Ifo Diosi cufini. ⁷Nantian nocon Ifo Diosin Samuel isca huani, —Mia yoiáfo cuscan ato nicahuun. Mia potapaitamarocon ua potapaicani un afanan ato niaifo inonma. ⁸Nan un ato Egipcio mai anoshon ihuunitian natianri ua potamisifo caifo futsafoan aton diosfo ramihuáfo cufifain ato ahuaa huashomisifo. Natianri mia nanscahuapaicani. ⁹Ascacun ato nicahuun nan apaiyaifo cuscan huahuu. Ascafia ato yoihuun niaifo futsa nan ato asca huatiro cuscaran inon, —ishon nocon Ifo Diosin Samuel yoini.

¹⁰Ascano nan nocon Ifo Diosin yoini cuscan Samuel ato tapimani. ¹¹Ato yoiquin isca huani,

—Nan niaifo futsan mato iquinanton mato isca huashquin: Maton furufo ranushumua imashquin ahuun taramutiyafo yafi ahuun caballofo iyoshononfo. Nan taramutiyafo foaifoanno maton furufo rufofo ichomashquin. ¹²Nan niaifoan futsa catontiro mil ranushumuáfoan aton niaifo inonfo. Ascano ratoran futsa cincuenta ranushumuáfoan aton niaifo iishquicani. Futsafoan niaifo mau huashofain yono chitushofain futsafoan ahuun taramutiyafo aromisifo non ahuun ashifo non ahuun piacatifo huashonon caifo futsafo fu rutunanonfo.

¹³Nan niaifoan maton ainfacufo ahuun pushu ano ihuishquin ahuun yonomatifo inonfo. Futsafo ahuun pichamisi icaino futsafo ahuun ininti huashomisi iishquin.

¹⁴Maton mau shara fianfain maton fimi uva sharafo fianfain maton fimi shara olivofori fiانشon ahuun oinmati futsafo inanshquin. ¹⁵Maton fasi ushufo atirifi fianfain maton mau anoa man chitua cuscarí mato fiain ahuun ranushumua niaifofo inanfain a fu yonomisi futsafori inanshquin. ¹⁶Maton oinmati nocofunufu ihuifain maton oinmati ainfofo ihuifain maton moi sharafori fianfain maton burrofo fianshquin nantifi ato yonopaiyai cuscan huashononfo. ¹⁷Ascashon maton chashoanfori atirifi fii ahuuna inon. Marifi ahuun yonomatifo man iishquin. ¹⁸Mato nansca huaitian man Diosi cufinshquin nan niaifoan afanan mato yonononma. Man cufinqui ascahuafaitocai nocon Ifo Diosin mato cumashquimaran, —ishon Samuel ato yoini.

¹⁹Nan ato tapimapaisharafaitocai ahuun tsain nicapainifoma. —iNanscanon! Norifi futsafoan aton niaifo cuscaran non fuchipai noco yononon. ²⁰Ascacun norifi nan mani futsafo cuscara non itiro. Nan niaifo noco yonosharafain noco noicasmaifoan noco rutupai fuaifoan nan niaifo noco iyotiro non ato rutunon, —ishon Israelifoan yoinifo.

²¹Nan yoiáfo cuscan nicaquin Samuel nocon Ifo Diosi nannori ahuun ointaifin yoini. ²²Nan Samuel cufini cuscan nocon Ifo Diosin nicaquin cumani isca huaquin, —Mia yoiáfo cuscan ato ashohuun. Aton niaifo futsa catohuun, —ishon nocon Ifo Diosin Samuel yoini.

Ascan nocon Ifo Diosin yoini cuscan nicain Samuel ahuun yora nan Israelifo

yoini isca huaquin, —Maton pushu rasi ano fotacahuun, —ishon ato yoini.

Saúl Samuelqui noconi

9¹Nanno Israeli mani futsa nan Benjamín ahuun funafo ato muran nocofunun ahuun anu Cis ini. Apa ahuun anu Abiel. Nan Abiel apa ahuun anu Zeror. Nan Zeror apa Becorat. Nan Becorat apa ahuun anu Afiah. Nan Afiah apa Benjamín ini. Nan Cis nocofunu shara ini. Nantiffain ahuunoa yoisharamisifo. ²Cispan ahuun furumun anu Saul. Nan Saúl fasi mutsispacoin cuyamasocoian. Rato ahuun caifo futsacai Saúl masoatian inifoma. Ahuun potin ano fusti masofo ini.

³Ascan shafa futsa Cis ahuun burrofo funoni. Ascano Cis ahuun facu Saúl yoini isca huaquin,

—Nocon oinmati futan burrofo funatahuun, —ishon apan yoini.

⁴Nan apan yonoo cuscan Saúl fu ahuun oinmati nan machifoti foafafainifo. Nan machifo Efraín mai ano finonfaintan Salisa mai ano funafiaquicai tsoan fuchinima. Ascano Saalim mai ano fofain Benjamínfo mai ano finonfainfiashocai burrofo fuchinifoma. ⁵Ascashon mai ahuun anu Zuf ano nocoshon Saúl ahuun oinmati yoini isca huaquin, —Non nasononhuun. Non natian nasoyamaiton uhuun upancai afanan burrohuunoa shinantamarocon nocohuunoa natian shinain non ahuara chaca finoanran, —ishon Saúl ahuun oinmati yoini.

⁶Nannori yoiaiton ahuun oinmati cumaquin isca huani,

—Nunofin nocofunu nocon Ifo Diosi tanasharacoian icaquin. Nantifi yorafoan nan nocofunuahuunoa yoisharamisifo. Nantofin Diosihuunshon inonpacoai cuscan yoimisi nanscaracoin finoinquin. Non ahuun pushu ano

canoncahuun. Nantoraca noco yoitiro raniamain non burrofo fuchitiroquin, —ishon ahuun oinmatinin Saúl yoini.

⁷—¿Non nan nocofunu ano cashomun non ahua inantiroquin? Man nocon tushu cuyoa. Noncai ahua futsa ayama non cashman inancoinpanan, —ishon cumani.

⁸—Toro cuno facafacaitsa fustifin un ayaquin. Un nan nocon Ifo Diosi tanamisi inantiro burrofohuunoa noco tapimanon, —ishon ahuun oinmatinin cumani.

⁹(Nan Israelifo ipaonifotian ahua futsa nocon Ifo Diosin yocapaonifo nantian yoinifo isca huaquin, —Non canon. Non Diosihuunshon inonpacoai yoimisi oincanon, —ishon yoinifo. Ascacun natian afanan Diosihuunshon inonpacoai yoimisi non anutamaroco nan Diosin tsain yoimisiran non huatiro.)

¹⁰Ascano Saúl ahuun oinmati cumani isca huaquin, —iAicho! Shara. Non canon, —ishon nannori cumani. Nannori yoitan nan nocofunu Diosin catoan icano fonifo.

¹¹Ascatan nan rafu Diosi tanamisiton ahuun pushu rasi ano machi ari mapuinifocaquin nan shomayafo unu fii fuaifoquin noconifo. Ascashon ato yocanifo, —¿Ranimun nan nocofunu Diosihuunshon inonpacoai yoimisi? ¿Natianmun ahuun pushu ano? —ishon nan shomayafo yocanifo.

¹²⁻¹³—Ai. Nanno. Nan fai cayacafin tapiaton foriscatacahuun. Nocon pushu rasi cusumunri natian nanno. Man ramashta noco ahuun yorafo futan machimamaquishon nocon Ifo Diosi ina rutushon inantani. Natian foriscatacahuun machi mamaqui cataima man aqui nocotiro. Atoqui nocoatima nuno icafoan piyotirofoma. Nantofin iquisi Upa Diosi

cufinyotiroquin ina rutuataima. Ascano nan cunafoan a futan pitirofo. Ascacun cariscatahuun natian man fuchitiroran, —ishon shomayafoan yoini.

¹⁴Nicacatan Saúl fu ahuun oinmati pushu rasi ano mapufainnifo. Nocotoshiquin oianfo Samuel arifi machi mapuaiton oinnifo.

¹⁵Nan Saúl nocoataima nocon Ifo Diosin Samuel yoini isca huaquin,

¹⁶—Na funamari nan nocofunu

Benjamínfo mai anoshon un miqui nichí. Ahuun mapoqui shuni ocahuun naanfin mato niaifo iishquiquin. Nan uhuun yora Israelifoan ua cufiainfo cuscan mun nica. Nan ua cufiainfo cuscan nicain un fasi atohuun ramapaicoin. Mani futsan nan Benjamín aton muran nan nocofunuahuunshon nantifi uhuun yorafo Israelifo un numashquin Filisteofoan ato ahuusca huanonma, —ishon nocon Ifo Diosin Samuel yoini.

¹⁷Ascano Samuel Saúl fuchishon nan nocon Ifo Diosin yoini, —Un mia yoita cuscan nan nocofunu uhuun yorafoan aton niaifo ishquiran, —ishon ahuun nomuran tapimani.

¹⁸Ascan pushu rasi shoi caincaiti ano Saúl Samuelqui oni ahuaara futsa yocaiyoi,

—¿Ua yoihuun ranimun nan pushu Dioshuunshon inon pacoai yoimisi icaquin? —ishon yocaiton.

¹⁹—Unfinquin. Nuno mapunyohuun. U futan machimamaquishon piishquin.

Funamari catashquin. Nan min nomuran min tapipaiyai cuscan un mia nantifi tapimanon. Ascano min catiro.

²⁰Nan burrofo osha rafu non fusti finoan funoitafo. Nan burrofohuunoa shinanchacayamahuun. Manfin fuchiafoquin. Un mia yoi min non min yorafo nan min caifo Israelifoan mia fuchipaicani min ato niaifo inon, —ishon yoiaiton nicaquin.

²¹Cumani, —Unfin Benjamínfo aton caifoquin. Non icai cuscacai rato Israeli futsafo aafoma non ica cuscan. Nonfin ichapama sharacaiquin. Nan uhuun yorafo fucai non ahuaama ishon yoiaiton. ¿Ahuuscai mian anori yويمun? —ishon Saúl cumani.

²²Nannori yoiaiton nicaquin Samuel Saúl ahuun oinmatiya pushu uhuapa muran yoni. Nan niaifofoan acamaquishon piti ano Samuel nanno ato tsaonni. Nantian treinta yora tsaonifo. ²³Ascashon Samuel pichamisi cunashon yoini isca huaquin, —Nan nami sharacoin un mia inainta niaifo inanpaiqui nan Saúl inanhuan pinon, —ishon yoini. ²⁴Nannori huaiton nicaquin pichamisiton nan nami ahuun quishi fiishon Saúl inanni pinon. Ascano Samuel Saúl yoini isca huaquin,

—Na nami pihuun. Un futsafo cunataima un mia na nami huashoan nan min nocoaitian min pinon, —ishon Samuel Saúl yoini. Ascashon Saúl Samuel futan nan shafata pinifo.

²⁵Ascatan pushu uhuapa murannoashu machi tunanmanri fotonifo. Fotocatan Samuel ahuun pushu fomancayanoashu Saúl fu tsainni. ²⁶Ascano shafa futsa iyoconaino Saúl pushu fomancaya anoashu moinacahuani. Ascashon Samuel cunani isca huaquin,

—Natian itisharahuun un mia nichinon min catanon, —ishon Samuel Saúl yoini.

Ascahuaino nantian itisharani. Ascatan nan rafu pushu murannoashu chifi cain furanifo. ²⁷Ascashu focani pushu rasi finon cuatan Samuel Saúl yoini isca huaquin, —Min oinmati yoihuun rufoto canon. Min u fu nituyotiro nocon Ifo Diosin ua yoia cuscan un mia tapimanon, —ishon Samuel Saúl yoini. Ascano nan Samuel yoia cuscan Saúl ahuun oinmati rufoto nichini.

**Samuel Saúl ahuun mapoqui shuni ocani
Israelifo aton niaifo inon**

10 ¹Ascano Samuel shuni motica fiitan Saúl ahuun mapoqui ocafain tamo tsoani. Ascashon Samuel Saúl yoini isca huaquin,

—Natian nocon Ifo Diosin mia catoan min yora Israelifoan noco niaifo min inon. ²Nan min nunoashu umaqui caitian min nocofunu rafuquin nan Raquel mai huanifoanno min atoqui nocoicai. Nan pushu rasi ahuun anu Selsa Benjamín ahuun funafoan mai ano min atoqui nocoaiton nan rafutan mia yoicani isca huaquin, “Nan min burrofo funaifin man fuchiafoquin. Natiacai min upan afanan burrofohuunoa shinantamarocon mia fasi shinain min ahuara chaca finoanran,” ishon nannori shinanquin. Nan rafutan mia yoishquicani.

³Nan min ato anoashu cai min ihui uhuapa Tabor ano nocoshquin. Nanno nocofunu rafu non fusti miqui nocoí. Nan rafu non fustifin Betel ano focaniquin nannoshon nocon Ifo Diosi cufin focani. Futsan cabra facu rafu non fusti foaino futsan misi rafu non fusti foaino futsan fichi tutso muran uva unu foicai. ⁴Nan rafu non fustifain mia yoisharafain mia misi rafu inainton nan misi fihuun.

⁵Nan min ato anoashu cai min nan Diosi ahuun mai Gabaa ano min nocoshquin. Nanno Filisteofoan aton ranushumuafon cushumisi ano. Min nocoaiton Diosin tsain yoimisifo nantian miqui nocoshcaniquin. Machi mamaquinoashu aton manutifo manuyanan fotoshcani. Nan manutifo ahuu anufo futsan salterio manufain panderofu manufain shaintifo manufain arpafu nan guitarra cuscaran manucani. Diospan tsain yoifocani. ⁶Nantian nocon

Ifo Diosin ahuun Yoshin Shara mia inanfain nantian ahuun curushhuunshon mia iquini. Ascano min futsafo futan minrifi min Diospan tsain yoishquin. Nocon Ifo Diosin Yoshin Shara mia fiananan huai minrifi nan futsafo cuscaran min inon. ⁷Nan un mia yoia cuscan min aino nocon Ifo Diosi mi fu ishquin. Nan min ahuara shara huapayai cuscan nocon Ifo Diosin mi fu rafuiquin.

⁸Natian Gilgal ano catahuun. Nannoshon siete dia oshatan ua manayohuun. Un miqui caicain nan un nocoaitian nocon Ifo Diosi ina rutushofain non coashonon. Non asca huaquifin nocon Ifo Diosi non ismaicai naan fustimain nocon Ifocoincun. Nan noco amapayai cuscan fusti non huashonon. Nonfin ahuunacoinquin. Nanscashon non ismasharanon. Ascashon ina futsari non rutunon nocon Ifo Diosin nocohuun ramapayaino non a fu rafushon ismashquin. Ascano nocon nomuran noco unimamanon. Non nansca huaquifin nocon Ifo Diosi non ismasharaicain. Nannoshon ua manahuun un miqui caicain. Un mia ahuara futsa non acai cuscan mia yoinon, —ishon Samuel Saúl yoini.

⁹Nannori yoiaiton nicain Saúl cani Diosin ahuun nomuran natian fianananriscas huani ahuara shara fusti huanon. Ascano nan Samuel yoia cuscan nanscaracoin nan shafata finonni. ¹⁰Ascano Saúl yafi ahuun oinmati Gabaa mai ano nocoquin oianfo Diospan tsain yoimisifo atoqui funifo. Nantian Diospan Yoshin Sharapan Saúl iquinain cuscan nantian arifi Diosin tsain yoini. ¹¹Ascan Saúl fu rafumisifoan nicaquin yoinifo isca huaquin, —iAira! ¿Saúl arifi Diospan tsain yoimisimun? ¿Ahuuscashuco Cispan facu arifi Diospan tsain yoimisi iquimun? —ishon nannori yoinannifo.

¹²Ascano nan chaima ica futsan yoini isca huaquin, —Nan ratoran futsafin nocon Ifo Diosi catoinquin ahuun tsain yoimisi iishquin. Nan apa ahuamafiano ahuun facun Diospan tsain yoimisi itiroran, —ishon ato yoinifo. Ascano tau huaquin yoinifo isca huaquin, —¿Iconmun Saulmun arifi Diospan tsain yoimisi? —ishon yocanifo. Ascan futsafoanri nannori yoimisifo.

¹³Nan Diosin tsain yoiquin anaititan Saúl machi mamaqui mapuni nan toquiri putsamuiniano noconi. ¹⁴Nanno nocoaiton apa futsan ahuun oinmati yafi yocani, —¿Ahuuscai man sama racamun? ¿Min rani nituyoamun? —ishon yocani.

—Non burrofo funaquin. Fuchiyamacaifin non Diospan tsain yoimisi Samuel ano caaquin burrofohuunoa noco tapimanon, —ishon nannori apa futsa cumani. ¹⁵—¿Samuel mia raquiri yoiamun? —ishon apa futsan yocani.

¹⁶—“Min burrofo man fuchiaforan,” ishon noco yoiaran, —ishon Saúl apa futsa cumani.

Ascafia Saulcai Samuel ahuun mapoqui shuni ocamana Israelifo niaifo inon ishoncai apa futsa tapimanima.

¹⁷Nantian Samuel atoqui nocoshon ahuun caifo Israelifo cunani nocon Ifo Diosi ahuun ointaifi mai Mizpa ano aqui funonfo. ¹⁸Nococashon Samuel ato yoini isca huaquin,

—Uhuun yora Israelifoan, nocon Ifo Diosin natian noco tapimai isca huaquin, “Un mato Egipcio mai anoshon ihuua. Nan Egipciofoan ato curushhuunshon mato omitsiscamani aton yonomati man inon. Ascano un mato numani nanfo futan futsafoan mato omitsiscamanifo cuscan afanancai man aton yonomatifo inonma,” ishon nocon Ifo Diosin yoini. ¹⁹Diosin fasi

mato shara huamisi man omitsiscaino nan man ahuara chaca futsa finoainton nanscarafohuunoa Diosin mato numani. Diosin mato sharahuapaifaaiton man potapaifain niaifo futsa man catonpai. Ascashon man yoiquin isca huai, “Natian non niaifo futsa funanon noco nanton yononon,” ishon man yoya. Natian nocon Ifo Diosi ahuun ointaifi ichanancahuun. Nan manifestu uqui fucahuun, —ishon Samuel ato yoini.

²⁰Ascano Samuel Israelifo nan manifestu cunani aqui funonfo. Nocoifoan Upa Diosin Benjamín ahuun caifofo catonni. ²¹Ascashon Benjamín ahuun yorafoti cunaino Matri ahuun yorafori catonni. Ahuun unutaqui Cispan facu Saúl catonni Israelifo aton niaifo inon. Ascafia Saúl funafiacaquica tsoan fuchinima. ²²Ascashon nantian afanan nocon Ifo Diosi cufinifo isca huaquin, —¿Ranimun Saulquin? —ishon nocon Ifo Diosi cufinifo.

—Nan maton forusafo maniafo muran onuaran, —ishon nocon Ifo Diosin ato cumani. ²³Nannori nocon Ifo Diosin ato yoiaiton nicacaquin forusafo mani ano funacaquin fuchinifo. Ascashon nan ichananfo ano atoqui ihuunifo. Saúl fasi cuyacoin masoa nantifi yorafa finoncoian. Tsoa futsacai ahuun Saultian masoa inima. Ahuun potin ano fusti masofo. ²⁴Ascano Saúl atoqui oaiton Samuel nantifi Israelifo yoini isca huaquin, —Na nocofununfin nocon Ifo Diosin catoanquin nocon niaifo inon. Rato Israeli futsacai Saúl cuscarama. Noco nantifi finoncoianran, —ishon Samuel ato yoini.

Nannori ato yoiaiton nicacaquin nantiffain oi ashcafinin yoinifo, —iAicho! iNafin nantishotapiquin nocon niaifo ipanacaquin! —ishon yoinifo.

²⁵Ascashon nan niaifoan atiro cuscan Samuel Israelifo tapimani. Niaifoan

atiro cuscan Samuel nocon Ifo Diosi ointaifi libro muran cununi. Asca huatan Samuel nantifi Israelifo aton pushu ano nichini.

²⁶Ascashu Saúl ahuun pushu Gabaa ano nasoni. Nocoano nocofunu mutsisipafo nocon Ifo Diosin aton nomuran shinanmasharaino Saulqui funifo a fu rafupacushcaquin. ²⁷Ascano nannoa nocofunu chacafoan fasi tsain chipunifo. Yoiquin isca huanifo, —Na nocofunucai ahuama. Aacai noco numatiroma, —icashu yoinannifo. Nantian Saulhuunoa shinanchacanifo. Nanfoancai ahuara futsan inanpaicoinnifoma. Aqui tsain chaca huafiaifoannocai Saúl puusinima.

**Saúl ahuun ranushumuafo futan
Amonitafo rutuni**

11 ¹Nantian Amonitafoan aton niaifo ahuun anu Nahas ahuun ranushumuafo yoini isca huaquin, —Itisharacahuun non Jabes nan Galaad anoa Israelifo rutui fonon, —ishon ato yoiaino nantian fonifo. Ascashon Israeli nocofunufo Jabes ano icafoan niaifo Nahas yoinifo isca huaquin, —Man noco rutuyamacunfin non mato oinmati itiroquin, —ishon Israelifoan yoinifo.

²Nannori huaifoan nicaquin nan niaifo Nahas ato yoiquin isca huani, —Non nantifi maton furo ocuma futsa tsucashon manifoti anoa non ismai matohuunoa shinanquin isca huanonfo, “Nan Israelifocai ahuamaran,” ishon mato cashu mutsama huashquicaniran, —ishon niaifo Jabes Israelifo yoini.

³Nannori huaiton nicacaquin Jabes pushu rasi anofoan aton niaifofoan cumanifo,

—Siete oshatan manayocahuun. Non nocon caifo nan icafoti anoa nocofunufo non atoquei nichinon min noco yoia cuscan ato tapimanonfo. Nan nocon

yorafoan noco numayamaino nan min yoia cuscan min noco huatiroan, —ishon cumanifo.

⁴Ascashu Jabes anoashu Gabaa pushu rasi ano Saúl icano nocoshon ato tapimanaifoanno nantifi fasi uainifo.

⁵Nantian Saúl ahuun mau anoashu ahuun moifo cachori oni. Nan uaicaifoan nicain. Ascashon futsa yocani,

—¿Uhuun yorafoan ahuuscashu fasi uaicaniquin? —ishon ato yocaiton. Ascano Jabes ano icafoan ato yoia cuscan Saúl tapimanifo. ⁶Nannori nicatapaiyaino Saúl Diospan Yoshin Shara nantian a fu rafutapaiyaino ahuun curushhuunoashu fasi ahuun nomuran sinacoinni. ⁷Ascashon nantian moi rafu rutushon fusti rasi ato pashcanan huaquin futsani. Ascashon nocofunufo nichini nan Israelifo icanoafoti nami fusti rasi ato inanonfo. Ascano Saúl ato nichia focashon ato yoiquin isca huani, —Noco yorafo yoicahuun “Amonitafo non rutui canon. Ascan nan noco fu ratoran futsa un non Samuel fu foyamaifo nan un moi rutushon ato shatumishti pashcanan hua cuscan aton moifori un nansca huairan,” —ishon Saúl ato yoini.

Nannori nicacani nocon Ifo Diosin Israelifo fasi ratumacoinnifo. Ascashu Saulqui nantifi Israelifo ichanannifo.

⁸Ascano nantian pushu rasi ahuun anu Bezece ano ichanannifo. Ascashon Saúl ato tanan huani. Nan Israel nocofunufo tres cientos mil icaifoanno Judáfo treinta mil inifo. ⁹Ascashon Saúl afanan nocofunufo nichini Jabes ano icafo ato yoiquin isca huani, —Ato pushu rasi ano nocoshon ato yoicahuun funamari fari masafinin racano non ato numai caicain ishon ato nannori yoitacahuun, —ishon Saúl ato nannori yononi. Ascashu nan nocofunufo Jabes ano

nococashon aton yorafoqui chaniaifoa
nicacani fasi unimacoinnifo. ¹⁰Ascashon
Jabes anoafaoan Amonitafo yoiquin isca
huani,

—Funamari man noco apaiyai cuscan
man noco huatiroran, —ishon Jabesfoan
Amonitafo yoini.

¹¹Ascano iyoconaino Saúl Israelifo
ahuun ranushumuafao ato nantifosi
pashcanan huapani. Rafu non fusti
manifo Amonitafo rutui fononfo.

Amonitafoancai tapinifoma Saúl ahuun
ranushumuafao atoqui nocoriscatani.
Ascashon nan shafatishon Israelifoan
Amonitafo fari masafinin racano ato
rutuquin cuyonifo. Nan ato rutuaifono
Amonitafo ratucoincani pashcai
futsunifo. Fusti rasi pashcai futsunifo.

¹²Asca huacatan Israelifoan Samuel
yoinifo isca huaquin,

—¿Ranimun nan nocofunufaoan
yoirafo, “Saulcai noco niaifo itiroma
noco iquishquin?” Nocoqui ato
ihuucahuun non ato rutunon, —ishon
yoinifo.

¹³Nannori yoi fiaifaoan Saúl ato yoiquin
isca huani, —Nonfin Israelifoquin. Na
shafata nocon Ifo Diosin noco numa.
Ascan noncai tsoa futsa rututiromaran,
—ishon Saúl ato yoini.

¹⁴Ascano Samuel nantifi Israelifo
yoini isca huaquin,

—Non Gilgal ano fononfocahuun Saúl
nocon niaifocoin ano non afanan nantifi
yorafoan ointaifi non yoinon, —ishon
Samuel nannori ahuun caifo Israelifo
yoini.

¹⁵Ascashu nantifi Israelifo Gilgal ano
fonifo nocon Ifo Diosi ointaifi yoiquin
isca huanifo, —Saulfin nocon
niaifoquin, —ishon yoinifo. Ascatan
nantian inafu rutunifo aton Ifo Diosi ato
fu rafucoiaifoaanno ismanonfo. Ascashu
Saúl fu nantifi Israelifo fasi
unimacoinnifo. Ascacatan fusinifo.

Samuel Israelifo yoini cuscan

12 ¹Ascashon Samuel nantifi
Israelifo yoiquin isca huani,

—Nan man ua yoi a cuscan mun
nantifi nica. Ascano natian un
Diosinhuunshon nocon niaifo un catoan
nanton noco iquinon. ²Natianfin man
niaifoyaquin nantofin mato yonoiquin.
Unfin mun anifoan. Nan un anifoatima
non natianrifi un mato sharahuamisi.
Nan un pushcoaitian un maton niaifo
imisi. Uhuun facufori mato fu iquin.
³Unfin natian nuno noco Ifoan Diosi
ointaifi non nocon niaifoaan nan nocon
Ifo Diosin catoan ahuun ointaifin un nia.
Ua yoi cahuun. ¿Unmain tsoan moi
onunfain tsoan burro onunfain un tsoan
paramisiquin? ¿Ascashomain un yorafo
omitsiscamamisiquin? ¿Ascatar tsoan
ua pui inanmun un mato fomanmisiquin
ratoran futsa chaca huashquin? Un
ratoran futsa chaca huamainquin ua
yoi cahuun un nanfo shara huanon,
—ishon Samuel nannori ahuun caifo
Israelifo yocani.

⁴Nannori ato yocaiton cumaquin isca
huanifo, —Ma. Mincai noco
paranyamafain min noco omitsisca
huamisima. Futsancai mia ahua
inanmisima min noco fomafain nan
futsa fusti min shara huanon. Mincai
ascara chacafo huamisisaran, —ishon
yoinifo.

⁵Afanan Samuel ahuun caifofo
yoiquin isca huani, —Nocon Ifo Dios ua
oinfain nan catoanton maton niaifo funa
Saúl ua oiainno tsoancai uhuunoa
yoitiroma un maton chaca huamisan,
—ato huaiton. —Icon. Mincai noco
chaca huamisisaran, —ishon
Israelifoan cumanifo.

⁶Ascano Samuel afanan ahuun caifo
Israelifo yoini isca huaquin, —Nocon Ifo
Diosin Moisés yafi Aarón catonni.

Atohuunshon nocon shunifo Egipcio mai anoshon ato ihuuni. ⁷Nan nocon Ifo Diosin nocon shunifo shara huashofain nocorifi shara huashomisi cuscan un natian mato shinanmani. ⁸Nocon shuni Jacob Egipcio mai ano iyopaoni. Ascashu chipo nocon shuni Israelifoan nocon Ifo Diosi cufinifo ato numanon. Ascano Moisés yafi Aarón nichini Egipcio mai anoashu na mai shara anoa ato ihuunon. ⁹Ascafia nantiacai nocon Ifo Diosihuunoa afanan shinannifoma. Ascano aton Ifo Diosin yononi cuscan Hazor icanoafo aton ranushumuafo niaifo Sísara non Filisteofo non Moabfo aton niaifoan Israelifo achinifo aton oinmatifo imashquin. ¹⁰Ascano nantian nocon shunifo fasi uaiyanan nocon Ifo Diosi cufinnifo isca huaquin, “Ifon, non mia chaca huafain non mia cachiquiri huashon nan caifo futsafoan aton diosfo rami huashon anunifo nan Baal yafi futsari rami huashon anunifo Astartéran huanifo non ato cufinnisi. Ascafia min natian nan noco noicasmafoqui min noco numaiton non mia fusti cufinfain nan min noco yonoai cuscan non mia ashoiran,” ishon nocon shuni Israelifoan cufinnifo.

¹¹Ascano nocon Ifo Diosin noco Jerobaal non Barac non Jefté non ua non afo matoqui nichini mato numafain. Nantifi noco noicasmafotiqui noco numani non atoqui ratutama non isharanon. ¹²Ascafia man man oian Amonitafoan aton niaifo Nahas ahuun ranushumuafoya nocoqui fuafu noco rutushaquin. Nanscaino man fasi ratucoian. Ascano uqui man fua. Nocon Ifo Diosin maton niaiofian ua man yoia isca huaquin, “Non niaifo futsan yopai. Nanton noco yonotiroran,” ishon man yoia. ¹³Ascafia oincapon. Natian nuno maton niaifo. Manfin Saúl catoanquin mato niaifo inon. Man yoca cuscan

nocon Ifo Diosin mato niaifo inan.

¹⁴Man noco Ifo Diosqui ratucain nan mato yoia cuscan huashofain mato yonomapaiyai cuscan nicasharafain ahuun tsainri nicaifain man cachiquiri huayamaino mato niaifofoanri nocon Ifo Diosi tanasharafo shara itiro. ¹⁵Man nocon Ifo Diosin tanasharatamarocon nocon Ifoan noco yonopaiyai cuscan nicacasmafain ahuun tsainri man nicayamaiton nan maton shunifo onaintimani cuscan matorifi onaintimacoinshquin.

¹⁶Natian nunoshon manayocahuun nocon Ifo Diosin ahuamamishti huatiro cuscan mato ismanon. ¹⁷Man man tapia nan non nocon fanafo non chituaitiancai oi fuama. Ascafia un nocon Ifo Diosi na shafata cufin turuimafain oi fumanon. Nocon Ifo Diosin nan acai cuscahuunshon man tapitiro man fasi Diosqui chaca hua niaifo futsa noiquin. Nan niaifo futsacai Dioscoimmaran, —ishon Samuel ato yoini.

¹⁸Ascashon nan Samuel cufian cuscan nan shafata nocon Ifo Diosin cana pishimafain oinhuanrasi fumariscatani. Ascaino nantifi Israelifoan shinanni isca huaquin, —Tsoa futsacai nocon Ifo Diosi cuscarama. Atofin ahuamamishti huatiroquin. Nocon caifo murancai tsoa futsa Samuel cuscarama. Nocon Ifo Diosi cufian cuscan nicacointiroran, —ishon yoinifo. ¹⁹Ascashon Samuel yoiqui isca huanifo,

—Nonfin nocon Ifo Diosi chaca huamisiquin. Nonfin chaca huaquin finacoinmisiquin. “Noco niaifo futsa catonshonhuun,” ishon non yoia. Natian nocon Ifo Diosi noco cufinshohuun. Min noco cufinshoyamaino non nai futsutiroquin, —ishon Israelifoan ratucoincaquin nannori Samuel yoinifo.

²⁰Nannori yoiaifoan Samuel ato cumaquin isca huani,

—Ratuyamacahuun. Man chaca huafiashton nocon Ifo Diosi cachiquiri huatamarocon nan mato yonoai cuscan huashocahuun. Ahuara futsa shinanyamacahuun. Unimayanan nan mato amapaiyai cuscan huashocoincahuun. ²¹Nan nocon Ifo Dioscoin potayamacahuun. Dioscoinfoma tanayamacahuun. Nanfoancai mato numatiroma. Nanfocai ahuama. Nanfoanricai mato ahuaara shara huamatiroma. Nanscarafofin ipaitsi rami huacashon nocon diosiran huamisifoquin. ²²Nocon Ifo Diosin mato catonni ahuun yorafo man inon. Nan mato potainocai ahuunoa futsafoan shinansharashquima shinanquin isca huashquicani, “Diosicai mato numatiromaran,” ishon ahuunoa nannori yoishquicani. Nanscacuai mato potapacunacama ahuunoa shinanchacanonfoma.

²³Un mato nocon Ifo Diosi cufinshoyamaquin un aqui chaca huatiro. Ascan unfin mato Upa Diosi cufinshofafainniquin. Nan un mato tapimanai cuscan man isharafain man cayacafi shara nocon Ifo tanasharanon. ²⁴Ascatai ointiaquimayamacahuun nocon Ifo Diosin ahuaara shara mato ashoa cuscan. Nan nocon Ifo Diosi fusti nicasharacoincahuun nan mato yoia cuscan ahuun curushhuunshon ashofafaincahuun. Nan mato shara huamisi cuscan nanfohuunoa shinanfafaincahuun. ²⁵A mato amapaiyai cuscan huatamarocon man chaca huaiton nan mato niaifo yafi matorifin nocon Ifo Diosin namaquin futsashquinran, —ishon Samuel Israelifo yoini.

Israelifo fu Filisteofo rutunannifo cuscan

13 ¹Saúl ahuun fari treinta fariyatian Israelifoan aton niaifo tauni. Ascashu nan aton niaifocoin

cuarenta y dos fari ahuun yorafo iquipaoni. ²Nan niaifoatian Saul, tres mil ahuun caifofo Israeli ahuun ranushumuafo catonni. Ascashon ranushumua futsafo aton pushu ano nichini. Nan tres mil a fu nituaino mil ahuun facu Jonatánia nichini Gabaa pushu rasi Benjamín mai ano fotanonfo. Nanno chaimashta mai machifo ahuun anu Betel. Nan dos mil ranushumuafo nituafo Saúl fu pushu rasi ahuun anu Micmas ano fonifo. ³Ascano nantian Jonatán nan mil ranushumuafo futan Filisteofo Gabaa anofo ato rutui fonifo. Ascano atirifi ato rutuaifoanno atirifi Filisteofo Gabaa mai anoashu ichonifo. Ascano samamashtacoin Filisteofoan nicanifo nan Israelifoan ato rutui fofo. Ascashon nantian Saúl manuti ahuun anu trompeta manumani nantifi ahuun caifofo nan Hebreofoan aton ranushumuafo yaimani Gilgal ano aqui funonfo.

⁴Ascano Saúl nantifi ahuun caifofo Israelifo tapimaquin isca huani, —Filisteofoan Gabaa aton cushumisi uhuapa ano uhuun ranushumua non Filisteofo aton ranushumuafo rutufain atirifi ichofain ato cushumisi uhuapacoin non chaca huaquin futsanifo. Ascano Filisteofoan natian noco fasi noicasmacoinran, —ishon Saúl ato yoini. Ascashon nantifi Israelifo ranushumuafo Saúl Guigal anofo ichanan huani. ⁵Ascano nantiari Filisteofoan aton ranushumuafo ichanannifo. Tres mil tarumutiya ichanan huafain seis mil caballoya ichanan huafain nan ranushumua atirifi tsoancai ato tanan huatiroma ato fu pushu rasi Micmas nan fari oaiquiri Bet-avén ano chaimashta ichanannifo.

⁶Ascano nantian Israeli nocofunfoan oinnifo Filisteo ranushumuafo fasi ichapacoin ichanannifo ato rutui

fuushcaquin. Nan ichanainfoan oincani fasi ratucuinifo. Ascashu mahua quini muran atirifi onupaifain chacafo muran onupaifain mai quini uhuapa muran onupaicain toquirininhuanfo cachori onupaicain pozo muranri onupainifo.

⁷Ascano atirifoan unu Jordán pocufainifo nan mai Gad yafi Galaad ano ichonifo. Ascano Saúl Gilgal ano nituyoni. Atirifi ranushumuafo fu nituaino fasi ranushumuafo ratucoincaini tari tarinifo. ⁸Samuel tau huaquin Saúl yoiquin isca huani, —Niaifo, ua Micmas anoshon ua manayohuun, —ishon Samuel Saúl yoini. Manafiainocai Samuel nocoatai inima. Ascano atirifi ranushumuafo Saulmaquinoashu fonifo. ⁹Ascano Saúl ahuun ranushumua futsa yononi isca huaquin,

—Ua ina fishotahuun. Un nocon Ifo Diosi ismanon nan noco yonopaiyai cuscan non ashonon nocohuun ramapainon non a fu rafupaiyai cuscan noco yononon, —ishon Saúl ahuun ranushumua yononi. Ascano nan Saúl yonoo cuscan ahuun ranushumuaton ina fushoni Saúl nan toquirifo putsamuinia acamaquishon ina rutuni nocon Ifo Diosi ismashquin.

¹⁰Ascano man ina coaquin cuyoano nantianri Samuel atogui nocoshon Saúl yoiquin isca huani, —iAicho! Man min nocoiran, —ishon Saúl yoini. ¹¹⁻¹²Asca huaiton Samuel cumaquin isca huani,

—¿Ahuuscaimun un nocoataima min ina rutushon coarisca huaquin? —ishon yoiaiton.

Saúl Samuel cumani isca huaquin, —Uhuun ranushumuafo man umaquinoashu foafo. Nan mian yoiatian min nocoyamaino nantianri Filisteofo Micmas ano ichananfo noco rutui fushcaquin. Nan Filisteofo ichanainfo cuscan mun oian. Ascaifaoan oinquin un

shinanquin isca hua, “Filisteofoan noco rutui fupaifiainfoancai un nocon Ifo Diosi cufiantaima noco cushusharanon.” Ascano un shinan nantian min nunomano unfin toquirifo putsamuinia camaquishon ina rutuaquin nocon Ifo Diosi ismafain non fasi nocon Ifo yopai cuscan noco cushunon, —ishon nannori shinain cuscan Saúl Samuel tapimani.

¹³Nannori yoiaiton nicaquin Samuel Saúl cumani,

—iOhuashta! Min fasi amaquri chaca shinan. Mia nocon Ifo Diosi yonoo cuscacai min huama. Nan mia yonoo cuscan min huaino nocon Ifo Diosin mia non min facufo non min funafori Israelifoan aton niaifo imapacucuaana. ¹⁴Ascashucaí min non min facufo Israelifo aton niaifo ipatiroma. Aafin shinain cuscan nocon Ifo Diosin nocofunu futsa nan shinain cuscaran catoinquin Israelifoan niaifo inon. Nocon Ifo Diosin mia yonoo cuscacai min aama. Ascan natiafin nocon Ifo Diosin nocofunu futsa catoinquin. Nan ahuun tsain tanapai nanfin Diosin catoin nocon caifoan niaifo inon, —ishon Samuel yoini.

¹⁵Ascatan Samuel Gilgal anoashu Gabaa nan Benjamínfoan mai ari caní. Ascano Saúl fu ranushumua atirifi nitunifo. Nantian Saúl ato tanan huani seis cientos ranushumuafo fusti a fu nituanfo. ¹⁶Ascano Saúl yafi ahuun facu Jonatán non aton ranushumuafo Gabaa Benjamínfoan mai ano inifo. Nantianri Filisteo ranushumuafo Micmas ano inifo. ¹⁷⁻¹⁸Ascashon Filisteo ahuun ranushumuafo ato nanti rasisi nan rafu non fusti pashcanan huapani. Atirifi nan icanoashu Ofra nan Saúl mai ano foaifoanno atirifi Bet-horón ano foaino atirifiri nan machihuan rafu nushmancayan ahuun anu Zeboim ano fonifo.

¹⁹Nantian Filisteofoan yononi cuscan Hebreofoan afanan nupu oni huafain ashifo oni huanonfoma. Ascacun Filisteofoan shinannifo Hebreofoan nupu yafi piyafa oni huashon nanfoan noco rututiroforan ishon nannori Filisteofoan shinannifo. Ascanocai Israel mai ano afanan tsoan ahuara futsan nupu cuscarafa oni huanima. Nantian nantifi nopufo Israelifo icano yamaicoin ini. ²⁰Ascan Israelifoan aton mai poquiti non ahuun ahuara nahuuti non rurati non fasi oroti nanscarafa Filisteofoan cuno yonomisifo ano fonifo ato ahuara cuno iishquishquin. ²¹Nantian Filisteofoan Israelifo ato pui yocapaonifo. Ahuun mai poquiti non ahuara nahuuti non rurati non fasi oroti nan ahuara cunofohuunshon Filisteofoan Israelifo fasi pui ichapacoin ato yocapaonifo nan yopaifo cuscan ato inanon.

²²Ascano Israeli ahuun ranushumuafocai afanan tsoashta nupu yafi ashifo tosa aya inima. Saúl yafi furun Jonatán nan rafusi nupu yafi ashiya inifo. ²³Nantianri Filisteofoan ahuun ranushumuafocai Micmas ano cushunifo nan Israelifoan finoainfoan ato ruturisca huashcaquin.

Jonatán Filisteofo rutui cani

14 ¹Nan shafa futsa Saúl ahuun furun Jonatán ahuun yonomati yoiquin isca huani,

—Non Filisteofo rutui canon nupu yafi ashifo ua foshoi focahuun. Nan unu pocufaitan aton cushumisi ano non canon, —ishon Jonatán ahuun yonomati yoini.

Nan acai cuscaai apa tapimanima. Jonatán apa yoitama ahuun oinmati fusti fu cani. ²Ascano nantian Saúl yafi ahuun ranushumuafocai seis cientos Gabaa pasoaton icafo ini. Nanno machi yafi

ihui ahuun anu granado. ³Ascano Saúl fu Ahitob furun Ahías nan ahuun caifofohuunshon Diosi cufinshomisifo nanfoansi sahuuti futsa cuscaran sahuutirofo. Ahías nan sahuuafocai cuscaran sahuua ini. Ahitob a fu nanua nocofunu ahuun anu Icabod. Ahitob apa Finees ahuun shota Elí ipaoni. Nan Elí pushu rasi Silo ano nocon Ifo Diosi fu tsainti pano pushu muranshon ahuun yorafohuunshon Diosi cufinshomisi ini.

Israelifoancai tapinima nan Jonatáncai ato fu inima. ⁴Nan Jonatán Filesteo ranushumuafocai nocopai cai mahuanhuan rafu cuyacoin nushmancayan nocotan inapaini. Nan mahuanhuan rafu anuquin Boses yafi Seneran ishon anunifo. ⁵Mahuanhuan futsan fari oai istafariri pushu rasi Micmas chaimashta ini. Futsan fari cai istafariri Gabaa chaimashta ini. ⁶Ascashon Jonatán a fu yonomisi yoiquin isca huani,

—Non unu pocufaini canon nan nocon Ifo Diosi nan Filisteofo icoinra huafoma ano non canon. Nanno non oincanon. Nocon Ifoan noco ashoaitoraca non ato rututiro. Ahuara futsacai nocon Ifo Diosi amatima huatiroma ahuun yorafa numanon. Nantofin yora fusti iyamarai yora ichapafohuunshon futsafo finoncointiroquin, —ishon yoiaiton.

⁷—Nan min shinan cuscan shara. Non atiro. Un mi fu unimai cairan, —ishon ahuun yonomatinin cumani.

⁸Ascano Jonatán yoini isca huaquin, —Non canon. Non unu pocufainaiton Filisteofoan noco oinonfo. ⁹Ascashon nanfoan yoiquin isca huaifoan non nica, “Nuri fuyamacahuun. Nannoshon noco manayocahuun non mato ari caicain,” ishon noco yoiiafoanno non atoqui caima. ¹⁰Ascan noco yoiquin isca huaifoanno, “Nuri mapui fucahuun,”

ishon noco yoiainfoanno non atoquei catiro. Nannori noco huaifoanno nocon Ifo Diosin noco tapimai aafin no fu caino non ato rutuquin finontiroran, —ishon Jonatán yoini.

¹¹Ascashu nan rafu Filisteoqui foaifoan ato oinnifo. Ascashon Filisteofoan yoiquin isca huanifo, —iOincapon! Nan Hebreofo aton quini murannoashu cain furacaniran, —ishon nannori ato cashu mutsama huanifo.

¹²Ascano Filisteofoan ato yoiquin isca huani,

—Nuri nocoqui mapui fucahuun. Non mato ahudara tapimanon, —ishon Filisteofoan ato cunanifo.

Nannori ato huaifoan nicaquin Jonatán a fu yonomisi yoini isca huaquin, —Nocon Ifo Diosin noco ashoin non ato rutunon. Uachori mapuinihuun, —ishon Jonatán ahuun yonomati yoini.

¹³Ascano nan rafu ahuun mucu futan ahuun tau yatashu manhuanhuan mapuininifo. Jonatán rucu caino ahuun yonomati acachori cani Filisteofo ano nococashon ato ichapacoin rutunifo.

¹⁴Jonatán futan ahuun yonomatinin samamashta veinte Filisteofo ahuun ranushumua rutunifo. Dos cientos metros cuana aton caya nanno pacutan nai futsunifo. ¹⁵Ascatan Filisteofo ratuaifoanno ahuun ranushumuafo nan cushumisifori nantifi ratucoinifo. Ascatapayaino nantian nocon Ifo Diosin yonoai cuscan fasi mai nayanaiyainacahuani. Ascaino fasi ratui finacoinnifo.

¹⁶Nantianri Saúl ahuun ranushumua cushumisifoan Gabaa nan pushu rasi Benjamínfo mai anoshon oinnifo Filisteofo aton ranushumuafo ichofoanfainnaiton Israelifoan oinnifo.

¹⁷Ascaiton Saúl ahuun ranushumua ranan yoiquin isca huani,

—Nantifi uhuun ranushumua ato cunahuu uqui funonfo. Ascashon oinsharacahuun rato ranushmuamain no fu ichanainmaquin, —ishon Saúl ato nannori yoini.

Ascano nantifi ranushumuafo Saúl ichananhuashon oian Jonatán yafi ahuun yonomati yamai ini. ¹⁸Nan nicatan Saúl Ahías yoini isca huaquin, —Nan Diosin ahuun cashon ua fishoriscatahuun, —ishon yoini. Nantian Israelifoan Diosin ahuun cashoya inifo.

¹⁹Nantian Saúl Ahías yoiatton nicaí Filisteo ranushumuafo fasi mucainifoannaifoan nicaquin Saúl Ahías yoini,

—Nanscanon. Ua afanan casho fushoyamahuun. Non Filisteofoqui canon, —ishon yoini.

²⁰Nantian Saúl ahuun ranushumuafo seis cientos fu cani Filisteo ranushumuafoqui fonifo ato rutui focani. Atoqui nococashon oianfo Filisteofocai afanan afi ranan shinannonannima. Niso cuscarafashu afiranan nopo rutunannifo.

²¹Ascano nantian Hebreofo Filisteofo fu iyomisifo. Ascano atomaquinoashu Hebreofo focanashu Saúl yafi Jonatán non aton caifo Israeli futsafo ato fu rafunifo. ²²Nan Israeli futsafo Efraín mai nan machifo ano onuafoan nicanifo Filisteofo ichofoanfainnaifoan nan Israeli onufiacashon cainnifoantan Filisteofo ato mufainifo ato rutui focaquin. ²³Israelifoan Filisteofo ato ichoni Bet-avén ocuma futsa. Ascano nan shafata nocon Ifo Diosin Israelifo numani.

Nocon Ifo Diosin Saúl potani afanan Israelifoan ato niaifo inonma

15 ¹Asca huacatan shafa futsa Samuel Saúl yoini isca huaquin, —Nocon Ifo Diosin ua yonoa cuscan un nocon caifo Israelifo tapimani nocon Ifo Diosin mia catoan min nocon niaifo

inon. Ascacun ua nicahuu, nocon Ifo Diosin mia yoiiai cuscan natian un mia yoinon. ²Nocon Ifo Diosin ahuun curushhuunshon ahuamamishti huatiro cuscan nan mia yoiquin isca hua, “Maton shunifo Egipcio anoashu fuaifotian nan Amalecitafoan ato rutupai fuafo. Ascan natian un ato onaintimai. ³Natian min ranushumuafoya ato ano fotacahuun ato nantifi rutuqui cuyononfo. Nantifi Amalecitafo cuyocahuun. Nocofunifo rutufain ainfofo rutufain facufo rutufain facumishtifo rutufain nantifi inafu moifo non chashoanfo non camellofo non burrofo non nantifi rutuqui futsashcaquin,” ishon nocon Ifo Diosin mia yonoaran, —ishon Samuel Saúl yoiaiton.

⁴Nan nicatan Saúl nantifi Israeli ranushumuafo Telaim mai ano ato ichanan huashon ato tanan hua ahuutimainquin dos cientos mil yafi Judá anoashu diez mil funifo. ⁵Asca huatan Saúl yafi Israeli ranushumuafo focani pushu rasi Amalec chaimashta machi rafu nushmancayan noconifo. Nannoshon ato manayonifo ato samamashta rutushcaquin. ⁶Nannoshon manaino Saúl Ceneofo tsain fomani isca huaquin,

—Amalecitafo icanoashu fotacahuun. Non ato rutuquin matori non rutupaimacai. Uhuun shunifo Egipcio anoashu nuri fuaifoan maton caifoan noco shunifo sharahuani. Ascan non matori sharahuapaifiai man Amalecitafoomaquinoashu man pashcayamaino non ato rutuaino matori rutupaiyamafiaquin non mato rututiro man ato fu natiroman, —ishon Saúl ato yoiaiton nicacani Ceneofo Amalecitafoomaquinoashu pashcanifo.

⁷Ascano Saúl futan Israeli ranushumuafoan Havila mai aria yafi

Shur mai aria nan Egipcio mai anoshon fari oaiquirishon Amalecitafo rutuqui futsanifo. ⁸Amalecitafoan aton niaifo ahuun anu Agag fusticai Saúl rutumanima. Amalecita futsafo nantifi Saúl ato rutumaquin cuyonifo. ⁹Ascan Saúl yafi ahuun ranushumuafo Agag niaifo rutuyamafain nan chashoan sharafosi rutuyamafain moi sharafo non moi cahua shoa sharafo non chashoan cahushara nan ahua fuchipaicoiainfo cuyopaitamarocon ato cushunifo. Ascan ahua chacafo non ahuamafo cuyonifo.

¹⁰Asca huashon nocon Ifo Diosin Samuel yoini isca huaquin,

¹¹—Saúl ua tanasharayamafain un yonoa cuscan afanan ua nica sharaima. Ascan uhuun nomuran mun fasi shinain. Un Saúl catonyamani niaifo icama shara icuanaran, —ishon nocon Ifo Diosin Samuel yoiaiton nicaquin Samuel arifi fasi shinancoinni. Yamutishon nocon Ifo Diosi cufinshini. ¹²Ascano iyoconaino Samuel Saúl funaiton futsan yoini, —Saúl pushu rasi Carmel ano man caa. Nanno toquirifo putsamuinia yorafoan oinonfo Amalecitafo rutuafo cuscan ahuunoa shinansharanonfo. Nanscashi Gilgal ano caran, —ishon yoinifo.

¹³Nannori nicatan Saúl icano Samuel cani. Aqui nocoaiton Saúl yoini isca huaquin,

—Nocon Ifo Diosin mia shara huanon. Nocon Ifoan ua yonoa cuscan mun huaaran, —ishon yoiaiton.

¹⁴—¿Iconmainquin ahuuscai un chashoan aton oi un nicaimun? ¿Nocon Ifo Diosin mia yonoa cuscan min huaquin ahuuscai un moifo aton oi mun nica? —ishon yocaiton.

¹⁵—Ranushumuafo Amalec anoashu fuafo. Nan chashoan sharafosi catonshon moi sharafori catonpacushon. Ascashon chipo man rutui min Ifo Diosi inain cafisca huashquin. Nansca

huaquin ahuun yorafo oinmanon. Ascafia ahuara futsafo rutufain non mafo non pushufo yafi non coaquin cuyoaran, —ishon Saúl cumaiton.

¹⁶—iAfanan puusiamahuu! Nocon Ifo Diosin yamu ua yoia cuscan nicahuun, —huaiton.

—Ua yoihuun, —ishon cumani.

¹⁷Ascaiton Samuel yoini isca huaquin, —Un ahuamaran ishon min shinanpaoni. Ascafia min natian nocon caifo Israelifo manifoti min nocon niaifo. Nocon Ifo Diosin nocon caifo ismayamua mia catoan min nocon niaifo inon. ¹⁸Ascan nocon Ifo Diosin mia yonoa isca huaquin, “Nan Amalecitafo fasi chacacoinfoquin. Ato rutuqui futsahuun. Min ranushumuafo yonohuun nantifi Amalecitafo rutucahuun. Ato nantifi rutuqui cuyocahuun,” ishon mia yonoa.

¹⁹¿Ascacun ahuuscai min nocon Ifo Diosi nicacasmamun? ¿Ahuuscai min samamashta ahuara sharafo non ina sharafoi min fiamun? Nantifi coaquin cuyohuun nocon Ifo Diosin mia hua. ¿Ahuuscai nocon Ifoan ointaifin min chaca huamun? —ishon Samuel yoiaiton.

²⁰Saúl cumani, —Ascan nocon Ifo Diosin ua yonoa cuscan mun huaa. Ua nichia cuscan mun caa. Un nantifi Amalecitafo rutuqui cuyoa. Aton niaifo Agag fusti un ihuaa. ²¹Ascan ranushumuafoan chashoan sharacoinfo non moi sharacoinfori fushoa nocon Ifo Diosina inon min Ifo Dioshuunshon toquiri putsamuinia Gilgal mai anoshon rutunonfo, —ishon Saúl cumani.

²²Asca huaiton nicaquin Samuel cumani, —¿Ratocaimun nocon Ifo Diosi fuchipaiquin? Min inafa ahuunshon rutushofain coashoshquin iyamarai nocon Ifo Diosin mia yoia cuscan aiton min nicasharaino fasi shara finacaian.

Nanscarafin nocon Ifo Diosi fuchipaicoquin.

²³Shointi yafi yoshin chaca fu tsainqui chacacoin. Nanscarifiiai nocon Ifo Diosi mia yonoa cuscan min ayamai nanrfin chacacoinquin. Ahuara afi rami huacashon cufimisifo cuscan fasi chacacoin. Nanscarifiiai nocon Ifo Diosin mia yonoa cuscan min nicacasmaifin chacacoinquin. Nocon Ifo Diosin mia yoia cuscan min acasmaiton natian nocon Ifo Diosin afanan mia niaifo imapaimaran, —ishon Samuel yoini.

²⁴Nicaquin Saúl cumani, isca huaquin, —Icon, mun chaca hua. Nocon Ifo Diosin ua yonoa cuscan un huayamafain min ua tapima cuscan un aama. Uhuun caifofoa un apaiyai cuscan un atoqui ratua. Ascacun ua yoiafo cuscan un hua. ²⁵Ascafiacun un chaca hua cuscan ua rauhuahuun. Afanan afohuunoa shinantamarocon u fu capun nocon Ifo Diosi non cufinyonon, —ishon Saúl yoiaiton.

²⁶Samuel cumani isca huaquin, —iMa! Uncai mi fu caima. Nocon Ifo Diosin mia yonoa cuscan min nicacasmaiton arifi mia pota min afanan nocon caifo Israelifoan niaifo inonma, —ishon Samuel yoini.

²⁷Asca huatan Samuel ifiacucahuanaiton Saúl ahuun sahuuti cupanan achini nitu huashquin. Achiquin ahuun sahuuti fashnuni.

²⁸Ascan Samuel yoini,

—Min uhuun sahuuti fashnua cuscan nanscarifi huaquin Ifo Diosin mia shatumana min afanan niaifo inonma. Upa Diosin min caifo futsa niaifo imanon. Aafin nocofunu sharacai mia finoanquin. ²⁹Nocon Ifo Diosin arus fusti sharacoin. Ahuunoashu fusti Israelifo isharatirofo. Nancai chanimisima. Nocofunun afanan shinan futsatiro cuscacai nocon Ifo Diosicai

ascarama. Nancai shinan rafuyama. A shinain cuscaracai fianananpacunacama, —ishon Samuel Saúl yoini.

³⁰Afanan Saúl yoini, —Mun tapia un chaca hua cuscan. Ascafiacun uhuun yorafoan aton niaifo patasharinofo non nantifi nocon yorafoan ointaifin u fu capun min Ifo Diosi cufishquin uhuunoa shinansharanonfo, —ishon Saúl yoini.

³¹Ascatan Samuel a fu cani. Saúl nocon Ifo Diosi cufini. ³²Chipo Samuel yononi, —Ua Amalecitafo aton niaifo Agag ua ihuushohuun, —huani. Agag ahuun nomuran shinanni isca huaquin, —Ua afanan rutupaiyamaino. Afanan uhuun nomuran un musuimaran, —ishon Agag ahuun nomuran shinain ratutama Samuelqui oni. ³³Ascaiton Samuel yoini,

—Min nopun facufo yafi ahuafu ichapacoin min rutumisi. Ascan natian min uhua facuoma iishquinran, —ishon Samuel yoini.

Nannori huaiton Samuel Gilgal mai anoshon nocon Ifo Diosi ointaifin nopun Agag rutuquin shatu mishti huapani.

³⁴Asca huatan Samuel ahuun pushu Ramá ano cani. Ascana Saúl ahuun pushu Gabaa ano nasoni. ³⁵Ascan nan Samuel naitiancai afanan Saúl oinnacama. Afanan oinyamafiaquin fasi ahuunoa shinancoinpaoni. Nocon Ifo Diosinri ahuun nomuran fasi shinancoinni. —iOhuashta! Un Saúl Israelifoan aton niaifo imanima shara icuanaran, —ishon Diosin shinanni.

Nocon Ifo Diosin David catonni niaifo inon

16 ¹Ascan nocon Ifo Diosin Samuel yoini isca huaquin,

—Mun yoia Saulcai afanan Israeli niaifo itiroma. Ascan afanan ahuunoa shinanyamahuun. Min moi masho muran shuni manuhuun. Asca huatan

Belén pushu rasi ano catahuun. Nanno a nocofunu Isaí icano catahuun. Ahuun furun futsa un catoan Israeli niaifo inon, —ishon Diosin yoini.

²—Ifon, uncái ari catiroma. Ua Saúl nicaquin ua rututiroran, —ishon yoini.

—Moi facuoma iyotahuun. Nocoshon ato yoihuun min na ina ua rutushon nai cuscan uhuunoa yoisharafain ua cufinon, —ishon ato yoihuun.

³Nantianri Isaí yoihuun min ua moi facuyamisima ua rutushonni oa atirifi funonfo. Ascan nantianri un mia tapimai rato Isaí ahuun furunmain un catoincain min caifoan aton niaifo inon. Nanton ahuun mapoqui shuni ocahuun naanfin niaifo iquiquin.

⁴Ascan nocon Ifo Diosin yoia cuscacoin Samuel huani. Belén ano nocoaino niaifo patasharinofo fasi ratucoincaquin Samuel yoiquin isca huanifo,

—¿Ahuara chaca finoanshu min oamun? ¿Ascayamarai unimai min oamun? —ishon yocanifo.

⁵Yocaifoan ato cumani, —Uncái ahuuscai oama. Un nocon Ifo Diosi moi facuoma rutushoni oa. Un moi facuoma rutuano marifi uqui fucahuun non Dioshuunoa yoisharafain non cufinon. Nanton noco amapaiyai cuscan fusti non atiroquin. Ascan Moisés yononi cusca acahuun. Ascaquifin man nocon Ifo Diosi ahuunacoinshon man ismatiroquin, —ishon Samuel yoini.

Asca huatan Isaí furufo futan Moisés yononi cuscan Samuel ato ashoni. Nanton moi facuoma rutuano a fu nanno inonfo. ⁶Ascan Isaí furufo fu aqui nococashon Samuel Isaí furu ahuun anu Eliab oinni nocofunu fasi cuyamasoa. Ascana Samuel ahuun nomuran shinanquin isca huani, —iAicho! Un shinanraça icon naafin nocon Ifo Diosin catoanquin. Ascacun un ahuun

mapofuchi shuni ocai nocon niaifo inon, —ishon ahuun nomuran shinanni.

⁷Ascan nocon Ifo Diosin yoini, —Min nocofunu cuyamasoa shara oian. Ascacun min shinan un nan nocofunu catoncun. Nan min shinain cuscari nannori yorafoan shinanmisi. Ascan uncai anori shinanmisima. Uncai Eliab catoanma. Uncai yora ahuun cuyamasoahuunshon un ato catoanma. Yorafoan aton no muran shinainfo cuscan un tapishocai un ato catontiro iyamarai un ato catoinmaran, —ishon nocon Ifo Diosin yoini.

⁸Isaí furu futsa ahuun anu Abinadab cunashoni Samuel oinnon. Ascaiton Samuel yoini, —Nantocai nocon Ifo Diosin catoanmaran, —ishon yoini.

⁹Ascan Isaí furu futsa Sama Samuelqui ocun oinon. Ascafia nanri Samuel yoini, —Natoricai nocon Ifo Diosin catoanma niaifo ipanan, —ishon Samuel yoini.

¹⁰⁻¹¹Nanscarifi ai nan sieite Isaí furufo Samuel ointaifi fusti rasi furi furinifo. Ascafiainfoancai Samuel Isaí yoini, —Nafoancai nocon Ifo Diosin catoanma. ¿Min furu futsa yamaimun? —ishon Samuel yocaiton.

—Uhuun facu chipocutonfin fasi funununshon chashoanfo cushuaquin, —ishon Isaí cumaiton.

—Futsa yonohuu min facu chipocu ua ihuishotanon. Nan nocoataimacai non piyoimaran, —ishon Samuel yoini.

¹²Ascano Isaí futsa nichini furu chipocu futsa ihuitanon. Pushco isininmisima oints. Ahuun fuso sharacoin fupishtacoin. Samuel oinquin nocon Ifo Diosin yoini,

—Naanfin un catoanquin Israelifoan aton niaifo inon. Ahuun mapofuchi shuni ocahuun un catoan cuscan ato ismanon, —ishon nocon Ifo Diosin yoini.

¹³Nicatan Samuel moi masho murannoa shuni fitan ochifoan ointaifi

chipocuton ahuun anu David ahuun mapofuchi shuni ocaino samamashta Diospan Yoshin Shara Davidqui nocoriscatan ahuun curush inanni. Shafatifi Diospan Yoshin Shara David fu rafuni ahuun curush shara inanni. Asca huatan Samuel afanan ahuun pushu Ramá ano nasoni.

Niaifoan Saúl yononi David ahuun oinmati inon

¹⁴Nantiancai nocon Ifo Diosin ahuun Yoshin Shara afanan Saúl fu rafunima man potacoian ini. Ascan nocon Ifo Diosicai yoshin chaca nitu huanima Saulqui noconon ahuun nomuran fucash huashquin omitsiscanon. ¹⁵Ascan Saúl ahuun oinmatifoan yoinifo isca huaquin,

—Niaifon, nocon Ifo Diosin yoshin chaca miqui nichia mia omitsiscamanon. ¹⁶Niaifon, noco nichihuun, nonfin mia nocofunu funashonicai ahuun manuti mia manushonon. Nocon Ifo Diosin yoshin chaca miqui nichiaitian nan nocofunun mia manushotiro nan yoshin chacanun afanan mia omitsiscamai cuscan muutamarocon min afanan isharairan, —ishon yoinifo.

¹⁷Ascan huaifoan ato cumani, —Nan futsa manuqui tapi shara ua funashotacahuun. Fuchishon ua ihuushoriscacahuun, —ishon Saúl ato yoini.

¹⁸Futsan nica cuscan yoini.

—Niaifon, mun nican Isaí pushu rasi Belén ano ica ahuun facu futsan manuti fasi tapisharacoian tsain shara yoifafainni. Ascanori nan pushcohuai ahuaqui ratuyamacain mutsisipa shara ahuun fuso fupishtacoin. Nocon Ifo Diosi a fu icaran, —ishon yoini.

¹⁹Nannori nicaquin Saúl ahuun oinmatifo nichini Isaí tapimashquin. Ato

yoini isca huaquin, —Man Isaí pushu ano nocoshon yoihuu un tsain fomai isca huaquin, “Min facu David chashoan cushumisi ua nichishohuun,” ishon ua yoishotacahuun, —ishon Saúl ato yoini. ²⁰Nannori nicatan Isaí David cunani yoiquin isca huashquin, —Niaifo Saúl mia cuna. Ascan burropan catu camaqui misi ichapa fofain fimi unu ahuun anu vino fichi tutso muran manushon fofain cabrari fotahuun Saúl inanshquin, —ishon Isaí David yoini. ²¹Ascano David aqui nocoshon nan Saúl yononi cuscan David aani. Saúl Davidqui unimacain ahuun noicoinni. Ascan David ahuun oinmatiri a fu ica ini. ²²Saúl fasi Davidhuun noicoinquin apa Isaí tsain fomani isca huaquin, —Un Davidqui fasi unimai. Ascan ua David yoishopun u fu nitutiromainquin uhuun oinmati iishquin, —ishon Saúl Isaí yoini. ²³Ascan nan yoshin chaca nocon Ifo Diosin nitu huayamaino Saulqui noconi David ahuun manuti manushonaino afanan Saúl ahuun ointi ihuu itamarocon afanan shinansharacoinni. Ascaino nan yoshin chaca amaquinoashu cayoni.

David yafi Goliat

17 ¹Nantian Filisteofoan aton ranushumuafo ichanannifo Israelifo rutunainfono. Nan pushu rasi Soco Judá mai anoa Azeca ano ichanannifo. Ascan nan mai anunifo Efes-damimran ishon yoinifo. ²Ascan nantianri Saúl Israelifoan aton ranushumuafo ichanan huani chaimashta machi rafu nushmancayan inifo. Israelifo icano nushmancayan mai mispa ano Filisteofo icafo ini. ³Ascan Filisteo ranushumuafo machi futsa ano icafo ini. Israeli ranushumuafori machi futsa ano icafo ini. Israelifori mai mispa nushmancayan inifo. Filisteo

ranushumuafo non Israeli ranushumuafo chaimanoashu ori rafunoashu oinonannifo.

⁴Ascaino Filisteofoan aton ranushumua futsan ahuun anu Goliat fasi uhuapacoin Israeli ointaifin catacatani. Ahuun cuya rafu non fusti metro. ⁵Ahuun cuno maiti maiya ini. Nan cuno ahuun anu bronceran huani. Ahuun cuno sahuutinin shofucumua ahuun ihuu cincuenta y cinco kilos. ⁶Ahuun cunopari ocuma rafu finushumucain ahuun puchiuhuriri ahuun ashi cunocoin chainipa puchiuhuri nutafain ⁷Ahuun ashin rushpi chai cushtocoin icaino ahuun cuno ahuun ihuu siete kilos cuana. Nocofunun futsan rucu cani ahuun cuno sapa nitunhuatiya tsomashomisi ashin chachinonma. ⁸Ascan Goliat nituaino Israeli ranushumuafo cunani ato yoiquin isca huashquin,

—¿Israelifoan, ahuuscaimun man ichanaincain manraca noco rutuicai? Unfin Filisteoquin. ¿Man Saúl ahuun oinmatifomun? Ascan fusti uqui fucahuun manmain ua rutuyamarai un mato rutuicai. Ascan fusti catoncahuun uqui onon. ⁹Ascan min caifoan ua rutuano nonfin Filisteofo non maton yonomatifo itiroquin. Ascan un min caifo rutuano manfin Israelifo noco yonomatifo ishquicai. ¹⁰Na shafata un mato yoi. Ascan ratoran futsa uqui musuquima uqui nichihuun. Non tapinon tsoanmain shuhuintiroquin, —ishon oi ashcafinin Goliat cunani.

¹¹Ascaiton nicacaquin Saúl futan ahuun ranushumuafoan shinannifo isca huaquin, —iOhuashta! Non ahuusca huatiromaran, —ishon shinancani. Fasi ratucoinca taritarinifo. ¹²Nantian Isaí anifoshta Belén ano ica ini. Nantifi ahuun facu nocofunufu ocho ini. Furu chipocuton ahuun anu David ini.

¹³Furun iyoaton ahuun anu Eliab. Chipocun futsa ahuun anu Abinadab ini. Acachorinoaton ahuun anu Sama. Nan rafu non fustifin Saúl ahuun ranushumua iniquin. Saúl fu fonifo Filisteofo rutui focani. ¹⁴⁻¹⁵Ascan David furu chipocucuin Saúl pushu ano apa pushu Belén ano catacatapaoni apan chashoanfo cushushoshquin.

¹⁶Nan cuarenta osha finontan shafatifi Filisteo cuyamasoacoin Israeli ranushumuafoan aton ointaifin catacatapaoni ato musumashquin.

¹⁷Ascan shafa futsa Isaí furu David yoiquin isca huani, —Upashtan, nan trigo tsoi forusa muran fofain misi mucu rafuti min ochi ranan ranushumuafo muran icafo ato foshoriscatahuun.

¹⁸Ascashon aton ranushumua niaifori queso mucu rafuti foshotahuun. Ascan min nasoaitian min ua tapimatiro min ochifo sharamainquin. Ato yoihuu ua tsain fumanonfo. ¹⁹Min atoqui nocotiro Saúl yafi ahuun ranushumuafo machi rafu nushumancaya ahuun anu Ela anoa. Nanno Filisteofo rutushcaquin icaforan, —ishon Isaí furun David yoini.

²⁰Ascan iyoconaino futsan chashoanfo cushuaino apan yonoa cuscan ahuun ochifo tushu foshoicai burropan catucamaqui cani. Israeli ranushumuafoan Filisteofo rutui foaifono David atoqui nocoquin nican oi ashcafinin yoinifo, —Non Filisteofo rutui canon, —ishon yoinifo. ²¹Ascan Israeli ranushumuafo yafi Filisteo ranushumuafo chaima oinonnancani rutunanpairianifo. ²²Nantan David ahuafo fushoa cuscan nan tushu yafi mafo cushumisi inantan ahuun ochi fu ranushumuafo icano ichoni. ²³Iyoa rafu non fusti tsaincaino nan Filisteo pushu rasi Gat anoashu ahuun anu Goliat nantifi ahuun caifo ranushumuafo finoncoian afanan cashon ato asca

huamisi cuscan Israelifo roani, —Mato ranushumua nocofunu futsa uqui nichihuun. Non tapinon ua rututiromainquin, —ishon cashu mutsama huaiton David nicani.

²⁴Ascano Israeli ranushumuafoan nicacani fasi ratucoincani Goliatqui musucani ichonifo. ²⁵Ascan Israeli ranushumuafoquin yoinannifo, —Nicapon nan Filisteo uhuapacoin yويمisi cuscan. Shafatifi noco yويمisi tsoamain a fu rutunantiroquin. ¿Saúl niaifoan yoia cuscan man man nicamun yoiquin isca huaiton? “Tsoan Goliat rutuafin un pui ichapacoin inaincai. Uhuun ainfacuri un inain ahuun ahuin inon. Non nantifi Israelifo faritifi pui yoca cuscan ahuun yorafo afanan non ato pui yocapacunacamaran,” ishon niaifoan yoiaran, —icashu Israelifo yoinannifo.

²⁶Ascaino David chaima futsa niaton yocani, —¿Tsoan Filisteo rutuamun ahua niaifoan inainquin? Nan Filisteo noco fucash huaquin noco cashu mutsama huaino non rafipaitiro. Manfin Israelifoan ahuun ranushumuafo manfin nan Diosin ahuun yoraforiquin. Nocon Diosifin natian niaquin. ¿Ahuuscai na Filisteo Diospan ahuun yorayamafiasion noco tsain chaca huafain noco musumapaimun? —ishon David ato yoini.

²⁷Nannori nicacatan ahuun yorafoan nan rama yoiafo cuscan yoiquin isca huanifo, —Min nica cuscan icon. Tsoan na nocofunu Filisteo rutuafin niaifoan nan inansharaiquin, —ishon David yoinifo.

²⁸Ascan huaiton iyoaton Eliab nicain chipocun David ranushumuafo fu yoinonainno Eliab aqui sinacoinquin yoini,

—¿Ahuuscai min nuno oamun?
¿Natian tsoan na chashoan fustirasi

cushuimun? Mun tapian min cacapaimisi. Min nomuranshon min shinanchacaifin. Rutunainfoan oinpai min oaquin, —ishon iyoaton Eliab yoini.

²⁹—¿Ahuuscai min uqui sinaimun? ¿Un ato fu tsaintiromamun? —ishon David cumani.

³⁰Ascan chaimashta shucucaitan futsafo yoca cuscan atori David yocani. Nan futsafoan cuma cuscan futsafoanri cumanifo. ³¹David yoiyai cuscan nanno niafoan niaifo Saulqui chaninifo. Ascano Saúl futsa nichini David aqui onon.

³²Ascano David Saúl yoiquin isca huani, —Niaifon, nan Filisteon noco caifofoqui noco ratumapai. Un nantifi uhuun yorafo yoipai nan Filisteo cuyamasoaqui ratunonfoma. Unfin min oinmatiquin. Un na nocofunu cuyamasoaqui un catiro rutushquin, —ishon yoiaiton.

³³Ascaiton Saúl cumani —Min na Filisteoqui catiroma rutushquin. Mincai ranushumuama. Minfin pushcoai fustiquin. Ascan Filisteo pushcohuinacahuanaitian futsafo rutuquin tapicoianquin, —ishon cumani.

³⁴⁻³⁵Ascaiton afanan David cumaquin isca huani,

—Niaifon, unfin min oinmatiquin. Un uhuun upan chashoanfo cushushomisi. Ascan masharo uhuapaton uhuun upan chashoan futsa foaiton un mufaintan uhuun chati un masharo cosha ahuun asha murannoa un chashoan tsucatan afanan chashoanfo muran ano un iyoa. Ascan nan masharonun ua pipaiyaiton un ahuun cotipan achishon un coshaino man naa. ³⁶Masharo rafu ahuun anu leon yafi oso un rutua. Ascan nocofunu Filisteo Diospan ahuun yorama. Nan masharo rafu un rutua cuscan un nanri rututiro. Manfin ranushumuafu

Diosinafoquin. Diosifin niaquin mato cushushquin. Ascafiaino Filisteon mato ratupai. ³⁷Nocon Ifo Diosin ahuun curushhuunshon ua numa ua masharo rafutan rutunonma. Nan masharonunhuan mutsisipafiashon nocon Ifo Diosin ua ahuun curushu inainno ua masharonun piama. Ascan nan Filisteon cuyamasofia Upa Diosin numatiro ua rutunonma, —ishon David yoini.

Nannori yoiaiton nicaquin Saúl yoini, —Aqui catahuun. Nocon Ifo Diosi mi fu caiquin, —ishon yoini.

³⁸Ascashon Saúl ahuun cuno maiti non cuno sahuuti David sahuumani. ³⁹Nanfo nutafain nopuri ahuun ona muran nanuni. Nan cuno maiti yafi cuno sahuuti sahuushon mua fasi ihuucuin ayacain catiro inima. Ascashon yoini, —Niaifon, uncain min sahuutifo un fuya huatiroma. Ascan un Filisteo rutucaiquicai un afo sahuutiroma, —ishon yoini.

Ascashon pucani. ⁴⁰Ascatan shorifaintan shushanaquinoa mucu fustiti toquiri fiitan ahuun noshati muran nanuni. Ahuun rusfi toquiri potati muran fusti nanufain chashoan cushumisiano ahuun poquitiya Goliat ano caní. ⁴¹Ascan Goliat oaino ahuun oinmatinin ahuun cuno nituhuati escudo cuscaran curushcoin pia yafi ashi iquinsonma tsomashonano funaiquimashta David shinain chaima oni. ⁴²Goliat David oinquin oian pushcoshta ahuun fuso sharashta. Ascacun Goliat ahuun nomuran shinan, —Na pushcoai ahuamaran, —icashu aqui cashupaini. ⁴³Ascashon Goliat David yoini isca huaquin,

—¿Min shinanmun un pashnacun min uqui poquitiya oa? —ishon yoini.

Ascan ahuun diosifo nan rami huafohuunshon Goliat Davidqui tsain chaca huani. ⁴⁴Afanan Goliat yoini,

—Nuri ohuu. Natiafin un mia rutuicai min nami cotocotofo pimafain yoinafori un pimaicai, —ishon Goliat yoini.

⁴⁵Ascaiton David cumani, —Min uqui oa nupu yafi ashi tsumashu. Ascan unfin nocon Ifo Diosihuunoashu miqui oaquin. Nanfin Israelifoquin nocon Diosin. Ahuun curushhuunshon ahuamamishti huatirofiacun min shinan ahuun yorafo cusuama. ⁴⁶Ascan na shafata nocon Ifo Diosin ahuun curush ua inainno un mia rutufain mia tushtui. Na shafatan min ranushumua Filisteo un nantifi maton caya cotocotofo non yoinafo ato pimai. Ascan manifeston tapitirofo Israelifo fu Diosin ica. ⁴⁷Ascan nupu yafi ashi ascarafocai nocon Ifo Diosin yopaima ahuun yorafo numashquin. Ascan rutunainfoan nocon Ifo Diosin apaiyai cuscan rato futsan shuhuinmatiro. Ascan na shafata min non min caifo nantifi nocon Ifo Dioshuunshon non mato rutuqui futsairan, —ishon David yoini.

⁴⁸Nannori nicatan Goliat chaima oaino David aqui ichoni. ⁴⁹Ascan aqui ichotan ahuun noshati murannoa toquiri fini. Ahuun rusfi toquiri potati finifoantan toquirinin Goliat fumanan tsacani. Ascaino Goliat pacuni. ⁵⁰Ascan David toquiri yafi rusfi potati fustiyafashon Filisteo cuya masocoinfiacun rutuni. Nupu maisifiashon David Goliat rutuni. ⁵¹Ascan David ichotan Goliat racacun nupu ahuun ona murannoa tsucatan ahuun tushtuni.

Asca huatan Filisteofoan oianfo aton yora Goliat David man rutua. Rato futsacai aton caifo murannoa Goliat cuscarama. Goliat cuyamasoa mutsisipacoin nantifi finoncoian. Ascan nan oincani Filisteofo fasi ratucoinnifo. Ratucoincani nasofuracani ichoriscanifo. ⁵²Ascaiton Israelifoan oincani fasi oi

ashcafinin yoinifo, —iAicho! Goliat man naaquin. Non Filisteofo rutunoncahuun, —icashon oi ashcafinin yoinifo. Ascatan ato mufaincatan ato rutupacunifo. Filisteo ichapacoinfo Israelifo futan Judáfoan ato rutunifo. Nan mau faihuun ahuun anu Saaraim ano yafi Gat non Ecrón ano Filisteofo rutuafono aton cayafo racani.

⁵³Ascano ato rutuquin anaititan Israelifo nasonifo nan Filisteofo icafoanno aton ahuara sharafo finifo.

⁵⁴David Jerusalén pushu rasi ano Goliat ahuun mapo foni. Ascan ahuun ashi non ahuun nupu non ahuun chati ahuun pano pushu muran huani.

⁵⁵Ascan David Goliat ano caiton Saúl oinquin Israeli ahuun ranushumua niaifoan ahuun anu Abner yocani isca huaquin,

—Abner, ua tapimahuun. ¿Na pushco David tsoan facumun? —ishon yocaiton.

⁵⁶—Niaifon, uncai tapiamaran, —ishon Abner cumaiton.

—Ascan ua tapimacahuun, —ishon niaifo Saúl yoini.

⁵⁷Ascan David nan Filisteo Goliat ahuun mapo tsomano Abner David Saulqui ihuuni. ⁵⁸Ascaiton Saúl David yocani,

—¿Pushcoshtan, ua tapimahuun min upa tsoamainquin? —ishon yocaiton.

David cumani,

—Uhuun upa anufin Isaiquin. Belén pushu rasi anofin icaquin, —ishon cumani.

David yafi Jonatán iconcain fusti yoiäfo cuscan nanscasi ai noinanpacunacafo

18 ¹Ascan David yafi Saúl yoinonain unucatan Saúl furun Jonatán Davidqui oni. Ascatan a fu tsaintan samamashta noicoiacufoanni. Afiri noimua cuscari David fasi ahuun noicoipaoni. ²Ascan nantian Saúl

yonomi cuscan David afanan apan pushu ano nasotama Saúl pushu ano ipaoni.

³Ascan Jonatán fasi David noicoinquin yoini isca huaquin, —David, un mia fasi noi. Un mi fu rafupacushquin. Un mia potapacunacamaran, —ishon Jonatán David yoiyoni. ⁴Nannori yoiaiton Jonatán ahuun sahuutifo inanfain ahuun nupu yafi piacati inanfain ahuun nanushumutiri David inanni nan ahuun noiyai cuscan ismashquin.

⁵Ascan nantifi Saúl yonoa cuscan David nanscacoín huashoaiton oin Saúl aqui unimaquin yoini, —Natian min ranushumuafoan aton niaifo patasharinoa min iquiran, —ishon yoini. Saúl David niaifo hua oincani nantifi Israelifo unimanifo. Ascanori ranushumuafoan niaifofori unimani.

**Nantifi Israelifoan David
fuchipaicoiainfoan oin Saúl David
shutipaipaoni noicasmaquin**

⁶Ascan David nan Filisteo Goliat rutuano Israeli ranushumuafo aton pushu ano nasonifo. Pushu rasi anoafo Israeli ainfofo fai cusumunrinoashu fanainyanan manutifo manunifo. Nan manutifo ahuun anu pandero non platillo manuyanana unimacani mononifo. ⁷Ascan monocai fanainyanan iscanifo fanaincaini,

—Saúl mil nocofunufu rutufiano David paratama diez mil rutuaran, —icashu ainfofo fanaincaifoan. ⁸Nan nicain Saúl ahuun nomuran Davidqui shinanchacai. Fasi sinacoinquin yoini isca huaquin, —David paratama diez mil rutuano ainfofo fanaincaini. Asca uhuunoa fanaincaquin mil fusti rutuaran icashu fanaincaini. Ascano samamashta David aton niaifo imapaitiroforan, —ishon Saúl ahuun nomuran shinanni.

⁹Ascashon nan shinanquin Saúl Davidhuunoa shinanchacapaoni.

—Ascacun un David oinfafainshquin niaifo inonma, —ishon Saúl shinanpaoni. Saúl fasi shutimitsapaimisicoín ipaoni.

¹⁰⁻¹¹Iyoconaino nocon Ifo Diosin Saúl afanan shinansharayamaiton oinquin yoshin chaca Saulqui nocoaitocai Diosin afanan nitu huanima. Ascan nan yoshin chacanun Saúl omitsiscamani. Nan yoshin chacahuunoashu Saúl tsain isininpaton nan nisofoan yoiainfo cuscan yoini. Nantianri David fuyamisi cuscan ahuun manuti Saúl manushoni. Ascan Saúl ahuun ashi tsomashon David rutupaifiaqui David ichoacuncahuanaiton canuni. Pushu cunuacua ahuun ashin tsacani. Saúl ahuun nomuran shinanquin isca huani, —Un natian uhuun ashin David tsacaquin nasharafain cunuqui tsacamai naanon, —ishon shinanni. Ichoacuncahuanaiton canuni. Ascahuatan afanan nanscari huaquin Saúl ahuun ashin David rutupaiquin canuni.

¹²Ascan nocon Ifo Diosin afanan Saúl fu itama David fu ini. Ascashu Saúl Davidqui ratuni. ¹³Ascashon Saúl yonoa cuscan David afanan a fu itiro inima. Nan a fu ahuun pushu ano itama mil ranushumuafo aton niaifo ini. David ranushumuafo aton niaifo sharacoincun ahuun ranushumuafo iyoni nan noicasmaifo ato potanon. ¹⁴Nocon Ifo Diosin a fu rafuaitian nantifi David acai cuscan shara ipaoni. ¹⁵Saúl oinni nocon Ifo Dioshuunshon David aca cuscan nantifi shara huaítion oin fasi aqui ratuni. ¹⁶David ranushumuafoan aton niaifo shara ini. Ascashon ato tapimani nan noicasmaifoan ahuusca huanonfoma. Ascainori nantifi Israelifo non Judáfoanri fasi David fuchipainifo.

¹⁷Ascan shafa futsa Saúl David yoini isca huaquin,

—Caifo futsafoan nocon Ifo Diosin nicacasmafo. Nanscacun nocon Ifo Diosin ato cuyoshquiai cuscan min ahuunoashu ratushquima nocon ranushumuafo min iyotiro nocon noicasmaifo rutunon. Min asca huaiton oinquin uhuun ainfacu iyoa mia inantiro min ahuin inon. Ahuun anu Merab, —ishon Saúl David yoini.

Saúl ahuun nomuran shinanquin isca huani, —Uncai David rutuima.

Filisteofo fu rutunancaquin nanfoan David rutucaniran, —ishon shinanni.

¹⁸Ascaiton David cumani isca huaquin,

—Niaifon, ucai ahuama. Uhuun upa non uhuun yoraforicai min ahuama.

¿Ascan ahuuscashuco un min raisi itirokun? —ishon David Saúl yoini.

¹⁹Ascafiacai Saúl David yoini cuscan huanima. Ahuun facu ainfo Merab David inantama nan nocofunu futsan ahuun anu Adriel inanni ahuun ahuin inon. Nan Adriel ahuun mai ahuun anu Mehola ini. ²⁰Ascafia Saúl ainfacu futsa ahuun anu Mical fasi David noicoiaiton futsan Saúl tapimanaino fasi unimani. ²¹Ahuun nomuran shinanni isca huaquin, —iAicho! Un David yoishquin uhuun facu fu fiananon. Ascan fiananfotaima un afanan David rutunainfo ano un nichishquin Filisteofoan nan rutunonfo, —ishon shinanni. Nannori shinanfiashon Saúl David yoini isca huaquin,

—Afanan un shinan futsa min uhuun raisi iishquiran, —ishon Saúl David yoini.

²²Ascatan Saúl ahuun oinmatifo yoini isca huaquin,

—David yoihuu, “Nocon niaifo Saúl mia fasi fuchipaiquin. Ahuun oinmatifoanri mia fasi fuchipaiquin. Ascan mia fuchipaiquin ahuun facu fihuun ahuun raisi iishquin,” ishon yoitacahuun, —Saúl ato yoini.

²³Ascan Saúl ato yoini cuscan nannori David yoinifo. Ascaiton David cumani,

—Un ahuuomacain uricai ahuama. ¿Ascan ahuuscashumun un niaifo Saúl ahuun raisi itiroquin? —ishon David cumani.

²⁴Ascan David cumai cuscan nan ahuun oinmatifo Saulqui chaninifo.

²⁵Nicashon Saúl ato yoini isca huaquin,

—David yoihuun isca huaquin, “Nan cien Filisteofo min rutuafin min uhuun facu fitiroquin. Nan ua noicasmaifofin un copiquin ato rutupaicain,” —ishon Saúl ato yoini. Ascafiashon ahuun nomuran shinan futsani. —David cien Filisteofo rutupaiyaino nanfoancaifin David rutushquicaniquin, —ishon ahuun nomuran shinanni.

²⁶⁻²⁷Ascan niaifo Saúl ato yononi cuscan nicai David fasi unimaquin shinanni isca huaquin, —iAicho! Natian un niaifo Saúl ahuun raisi itiroran, —ishon shinanni. Ascan Saúl ainfacu inantaima ahuun ranushumuafo futan David dos cientos Filisteofo rutunifo. Ascan Saúl yoca cuscan David dos cientos Filisteofo rutushon ismani. Ascashon Saúl ahuun facu Mical David inanni afu fiananon.

²⁸⁻²⁹Ascano nocon Ifo Diosin David fu rafucoiaino ahuun facu Mical David noicoiyain cuscan Saúl tapiquin finacoianshu aquí musuni. Ascan nan a fu iqui tauaitian nantian yafi nan naitian Saúl David noicasmapaoni. ³⁰Ascatori David nantifi Israelifoan ato ranushumua niaifofo finoncoian. Nanfoan noicasmacaquin rutunifo cuscan David paratama rutuni. Ascashon nantifi ahuun caifo Israelifoan Davidhuunao nicasharafain ahuunao shinansharanifo.

Saúl David rutupaipaoni

19 ¹⁻²Ascano chipo Saúl ahuun facu Jonatán yafi ahuun oinmatifo yoini isca huaquin, —David rutuhuun, —ishon ato yoini. Ascafiaino Jonatán

fasi David noicoinquin a rututamarocon apan yoini cuscan David tapimani.

—Uhuun upan mia rutupai. Oinfain funamari onutahuun. ³Ascan min onuano un fasi funununnoashu uhuun upan fu un tsainquin mihuunoa. Asca nan ua yoi ai cuscan un mia tapimanon, —ishon yoini.

⁴Nan iyoconaino Jonatán apa fu tsainquin Davidhuunoa yoisharani isca huaquin,

—Upashtan, minfin niaifoquin. David chaca huayamahuu. Aafin min oinmatiquin. Mia chaca huatamarocon mia shara huashomisi. ⁵¿Man min ointiaquimanamun Filisteo cuyamasocoian David rutuyamacun aatofin Goliat David rutu cuanaquin? Ascafia David Filisteo rutuaino nonfin Israelifo Diosinhuunshon fasi Filisteo ichapafo rutua nococai ahuusca huafoma. Ascaiton oin min fasi unima. ¿Ascan ahuuscai min David rutupaimun? Aatocai ahua chaca huamisisima. ¿Min ipaitsi David rutupairan? —ishon Jonatán apa yoini.

⁶Ascaiton nicaquin Saúl furu cumani isca huaquin,

—Diosin ua nicaino un mia icon yoi. Uncai David ato rutumanimaran, —ishon yoini.

⁷Ascan Jonatán apa yoi ai cuscan nicashon David cunani nantifi tapimashquin. Jonatán apa ano David iyon. Nan iyopaoni cuscan David Saúl fu afanan ini.

⁸Ascan chipo afanan Filisteofo funifo Israelifo fu rutunanshcaquin. David arifi ranushumuafo fu cani Filisteofo fu rutunanshquin. Ato rutuqui finacoiyainfoan oin Davidqui ratucani ichonifo. ⁹Ascatan David afanan Saúl pushu ano nasoni a manushoshquin ahuun no muran unimanon. Asca huafiaino Saúl pushu muran tsaoshon

ashi tsomani nocon Ifo Diosin Saulqui yoshin chaca nichinni nan fucashcoin huanon. ¹⁰Ascan ahuun ashin David tsacapaiquin curushcain tsacani. Asca canufainnicai David ichoacuncahuanaino ashi cunuhuu nitani. Ascaino nan yamu David ichoni Saúl rutunonma. ¹¹Ascashon Saúl ahuun ranushumuafo David pushu ano nichini cushunonfo. Ato yoiquin isca huani, —Funamarishta David pushu murannoashu cainyaiton rutucahuun, —ishon Saúl ato yononi. Ascaiton David ahuinin Mical tapishon funu yoini isca huaquin,

—Min na yamu nunoashu cayamaiton funamarishta mia rutucaniran, —ishon ahuinin yoini.

¹²Ascatan Mical ahuun funu David cunu shoi caincaiti anoshon funu nichini. Nan yamu ichotanon. ¹³Funu nichitan Mical ahua yora ointsa rami huashon aton oshati muran racoshon ratani. Ahuun mapoquiri cabra ahuun ranin maraconi. ¹⁴Ascan funamarishta David rutushquin achipaiyaifoan ahuin Mical ato yoini, —Uhuun funu isininqui racaran, —ishon ato yoiaino. ¹⁵Saulqui chaniaifoan afanan ato yononi isca huaquin,

—Ascan ahuun oshati muran racafiacun ua ihuushotacahuun un rutunon, —ishon ato yononi.

¹⁶Ascaino David pushu muran iquifaitan oianfo ahuun oshati camaqui ahua yora ointsa rami hua raca ini.

Cabra ahuun ranin maracoshon rata ini. ¹⁷Ascan Saúl ahuun facu Mical cunashon yoini isca huaquin,

—¿Ahuuscai mian paranmun? Natian nan David un noicasmai min nichia un achinonma, —ishon yoini.

—Upashtan, ua yoi ai cuscan un ayamaiton ua rutushquin ua huaaran, —ishon Mical cumani.

¹⁸Ascan David Ramá pushu rasi ano ichoni. Ichoashu Samuel pushu ano noconi. Ascashon Saúl chaca hua cuscan nantifi David Samuelqui chanini. Aquí chaniaiton nicaquin Samuel nan mai Naiot ano David iyoní. ¹⁹⁻²⁰Ascan David Naiot mai ano cacun futsan Saúl tapimani. Ascashon Saúl ranushumuafo nichini David achinonfo. Ascafiano nococashon oianfo Diosin tsain yoisimiso non aton niaifo Samuelri Diospan Yoshin Sharahuunshon Diosihuunua yoiainfo. Nicacashon Saúl ranushumuafori Diosin ahuun Yoshin Sharapan ato shinanmasharaino arifi Diosihuunua yoinifo.

²¹Saúl atohuunua nicaquin ranushumua futsafori atogui nichini. Ascanori nanfoanri Diosin Yoshin Sharapan ato shinanmasharaino ahuun tsain yoinifo. Ascaino Saúl afanan futsafo nichini. Nanscari huaquin nanfoanri Diosin Yoshin Sharahuunshon yoinifo. ²²Ascano ipaitama Saúl arifi Ramá ano caní. Pozo ahuun anu Secú ano nocoshon futsafo yocani, —¿Ranimun Samuel yafi David? —ishon yocaiton. —Naiot Ramá ano icaforan, —ishon cumanifo. ²³Nan nicatan Saúl ari caní. Nanscarifiaquin Diosin Yoshin Sharapan arifi iquinai cuscan nan cahuanaitishon Diospan tsain yoini Naiot mai ano nocoai chain. ²⁴Ascan nocoshon Saúl ahuun sahuutifo pucashu racani. Samuel ointaifi chitoriashon shafatishon non yamutishon Diospan tsain yoiaiton oinquin futsafoan yoinifo isca huaquin, —¿Saúl arifi Diospan tsain yoisimismun? —ishon yoinifo.

Jonatán David shara huashoni

20 ¹Ascano David Naiot Ramá mai anoashu Jonatán icano ichoni. Nocoshon yocani, —¿Un ahua chaca

huamun? ¿Un min upa ahua chaca huamun ua rutupaiyai? —ishon David Jonatán yocaiton.

²—¡Ma! Uhuun upancai mia rutuima. ¡Shinanpo! Uhuun upa ahua huataima ua rufofo yoisimi. Ahuara shara huayamafiaquin ua tapimayomisi. ¿Ascan mia rutupaifiaquin ahuuscai ua yoiyamamun? Ma. Un shinancai iconma, —ishon Jonatán yoiaiton.

³Nicaquin David cumani isca huaquin, —Diosin ua nicaino un mia icon yoi. Min upa tapia mian noiaiton. Ascan mia ointi isinmapaiquima mia foman min tapinonma. Ascan Diosiri min ua nicai cuscan un mia icon yoi min upan ua samamashta rutupairan, —ishon David yoiaiton.

⁴—Ascan un mia ashoai cuscan ua tapimahuun un mia ashonon, —ishon Jonatán cumaiton.

⁵David cumani isca huaquin, —Funamari nocon caifioan fustitian ahuun anu oshu ina funano min upa ua yoita mato futan pinon. Ascan un mato futan piyamaiforan un fasi fununon onuicaicain. Un nanno osha rafunon fusti yatatifi onuicai. ⁶Min upan “¿David raqui caamun?” huaiton yoihuu isca huaquin, “David caashquin ua yocquin tau hua Belén ano apa icano coshicoi caashquin nantifi ahuun yorafo futan amisi cuscan nocon Ifo Diosi ina rutushoni cairan,” ishon ua yoia. ⁷Ascan mia upan cumasharaiton min shinantiro ua rutupaima. Ascafia min uhuunua yoiaino sinaiton oinquin min tapitiro ua rutupaiyai. ⁸Ascan uhuun yorashta. Man min tapia min u fu nocon Ifo Diosin ointaifin non yoinonansharapacunaca. Ascan ua upa achimayamahuun. Min shinain un min upa chaca huacun min upa ua achimatamarocon mifin ua rutuyohuun, —ishon David yoini.

⁹—iMa! Uncai mia asca huapacunacama. Ascan uhuun upa mia rutupaiyai tapishon un mia yoi cuanaran, —ishon Jonatán cumani.

¹⁰—¿Min nica ua upa rutupaiyai tapishon ahuuscashomun mian tapimatiroquin? —ishon David yocaiton.

¹¹—Nuri ohuu. Non fasi fununun canon, —ishon Jonatán cumani. Ascashu nan rafu fasi fununun fonifo.

¹²Nocotan Jonatán yoini isca huaquin, —Nonfin Israelifoquin nocon Ifo Dioshuunshon un mia icon yoi. Ascan osha rafu finontan uhuun upa mihuunoa shinan cuscan un tapishquin. Un nica mia ahuusca huayamaiton un mia tapimatiro. ¹³Ascan un nicaí mia uhuun upa chaca huaiton un mia tapimayamaino min ichocun nocon Ifo Diosin ua fasi asca huapainon. Nocon Ifo upa fu ipaoni cuscan natanri mi fu ica. ¹⁴⁻¹⁵Ascan un niyoa natian nocon Ifo Diosin ua noia cuscan minrifi ahuunshon ua shara huafafainhuun. Mia noिकासmaifo nocon Ifo Diosin cuyoaitian uhuun yorafo shinanhuun. Ato shara huafafainhuun, —ishon Jonatán yoini. ¹⁶Asca huatan afanan nocon Ifo Diosihuunshon Jonatán David yoini isca huaquin, —Mia noिकासmaifo nocon Ifo Diosin ato cuyopainon. ¹⁷Ua noiquin afanan ua yoiyohuun uhuun yorafo min ato shara huashquinran, —ishon Jonatán David yoini. Ascan Jonatán afin noimuai cuscan Davidhuuri noicoinni. ¹⁸Ascan afanan Jonatán David yoini isca huaquin, —Funamari nocon caifoan fusititian ahuun anu oshu ina funaran huamisifotian min no fu iyamaiton uhuun upan ua yocashquin ahuuscaimain min no fu iquimacai. ¹⁹Ascan min onuitano afanan osha rafu finoanno yatashta toquirifo putsamuinia

anoshon manayohuun. ²⁰Nannoshon min manaino uhuun piacatinin un toquiri putsamuinia chaima pianquin rafu non fusti huai.

²¹Ascan huashon un furonanfacu nichin ua piafo fushonon. Min nican un furonanfacu yoiquin isca huai, “Toquirifo nuquirishtanoa uhuun piafo fuchishon ua fushohuun,” ishon un furonanfacu yonoaiton nicaquin min nocon Ifo Diosihuunshon tapicoitiro uhuun upa mia ahuusca huaima. Ahua chacacai mihuunoa shinainma. Ascan nannori nicashu osharahuun. ²²Ascafia un furonanfacu isca huaquin yoi, “Uhuun piafo min fuchiamia. Fasi orishta cashon uhuun piafo min fuchitiroran,” ishon un furonanfacu yoiaiton min tapitiro uhuun upa mia chaca huapaiyaiton. Nicaín min nuno itiroma. Musu itiro. Ascano min mai futsa ari ichotiro. ²³Ascan nan non yoinonansharaita cuscan nocon Ifo Diosin noco nica. Nonmain nanscasi ai shara huatananpacunacaquin, —ishon Jonatán David yoini.

²⁴Asca huaiton nicatan David fasi fununun onuni. Nantianri oshu ina funa fusititian niaifo Saúl ahuun pushu muran acamaquishon piti ano tsaoni piishquin. ²⁵Cunuquitafishu tsaonmisi cuscan afanan nannori tsaoni. Furun Jonatán acamaquishon piti ocuma futsa tsaoni. Ranushumua niaifo ahuun anu Abner Saúl chaimashtacoin a fu tsaoni. Ascan David tsaonmisi anocai tsoa tsaonima. ²⁶Nan shafata Saúl ahuashta yoitama puusinima. Ahuun nomuran shinanni isca huaquin, —Nocon Ifo Diosin yononi cuscan non ahuara chaca ramanshon non futsafo futan pitiroma a ina Diosihuunshon rutushon piaino. Ascan un shinain David ahuara chaca ramanshon no futan pitiroma. Ascashu nocoqui oamaran, —ishon Saúl ahuun nomuran shinanni.

²⁷Ascano iyoconainocai David afanan ato futan pishquin onima. Ascaiton Saúl furun Jonatán yocani, —¿Ahuuscai Isaí facu afanan noco futan pifafainfiashu na shafatari oamamun? —ishon Saúl yoini.

²⁸Ascaiton Jonatán cumani, —David ua yoita isca huaquin, “Ua Belén ano nichipun. ²⁹Nanno oshu ina funa fusititian ina rutushcaquin nocon Ifohuunshon shinanyonifo. Ascacun uhuun ochin ua yonoa urifi un ato fu inon. Ascan ua noicoinquin ua nichipun uhuun yorafo fu un inon,” ishon ua yoita. Ascan no fu icamaran, —ishon Jonatán apa yoini.

³⁰Nannori nicatan Saúl ahuun furuqui fasi sinacointaquin yoini, —Min uhuari chacacoin ano. Minrifi min fasi chacacoin. Min shinanmun un tapiama min Isaí facu niaifo imapaiyai. Min icai cuscan min uhuari rafipaitiro. ³¹Nan Isaí facu nianocai min niaifo itiroma. Ascacun ua ihuurisca huaiyohuun un rutunon, —ishon yoiaiton.

³²—¿Ahuuscai min David rutupaimun? ¿Ahua chaca huamun naanon? —ishon Jonatán apa yoiaiton.

³³Cumatamarocon Saúl ahuun ashi furu rutupaiquin tsacani. Asca huaitofin Jonatán tapiniquin iconcoin apan David rutupaiyai. ³⁴Ascaino apaqui fasi sinacoin Jonatán acamaquishon piti anoashu funini. Nan shafa fusticai afanan ahua pinima. —Uhuun upa David fasi chaca huaran, —ishon Jonatán David shinancoinni. ³⁵Ascan iyoconaino David yoita cuscan Jonatán furonanfacu chifi cainquifaitan yoini isca huaquin, ³⁶—Na pia un piancai ichoshon ua fishoriscatahuun, —ishon yononi.

Nan yonoai cuscan facu ichoni. Jonatán pia fasi chaicoin pianquin furonanfacu finonmacoinni. ³⁷Facu piaqui noco cuanaiton Jonatán cunashon yoini isca huaquin,

—Pia pacu ano min nocoamaqui.

³⁸Nituquima orishtaquin afanan ichotahuun, —ishon Jonatán facu yononi.

Ascaino ichoicai piaqui nocoshon ifo fushoni. ³⁹Jonatán David yoita cuscacai facun tapinima. Jonatán futan David fustiton tapinifo. ⁴⁰Ascan Jonatán piacati non piafo facu inanquin yoini isca huaquin, —Pushu rasi ano ua foshotahuun, —ishon yononi.

⁴¹Ascan facu caiton David toquiri putsamuinia ano ocuma futsa onu ano Jonatánqui nocoshon David maiqui fuoshopacucahuan rafu non fusti ashoni. Asca huatan icononancunfoancatan uaiquitanannifo. Nan rafu uaicaifono David uaiqui finacoinni. ⁴²Asca nan rafu fasi shinanonainfoan Jonatán yoini isca huaquin, —Natian min casharatiro. Non nocon Ifo Dioshuunoashu non yoinonan sharapacumisi. Ahuun ointaifi non yoicoian nocon Ifon Diosin min funafo non uhuun funafori ato cushusharapacunaca, —ishon Jonatán David yoini.

Ascaino David nannoashu caino Jonatán pushu rasi ano nasoni.

David Saúl rutupaiquin rutu cunafiaшон rutupainima

24 ¹Ascan Saúl Filisteofo rahuinfainni ichoicai ahuun pushu ano noconi. Nocoshon nican David tosa istaipama ano ahuun anu En-gadi ano cani. ²Cashon nica Saúl tres mil ranushumuafu catonni a futan David funai fononfo. Cabrafo tosan ifoyayamafiaшу toquirifo ano foafafainnaifoanno Saúl fu fonifo David funai focani. ³Ascan nan fai cusumunri chashoanfo icafo ano Saúl mahua quini muran iquini ano poishquin. Tapinima nan mahua quini muran David yafi a fu rafuafo a muran onufiacun. ⁴Ascan David fu rafuafoan fashushu yoinifo,

—Natian min Saúl rututiro mia afanan fucash huanonma. Na shafatan nocon Ifo Diosin mia yoia isca huaquin, “Un Saúl miqui nichishquin min apaiyai cuscan min huanon,” —ishon ahuun yorafo David yoini. Ascaino funaiquimashta acachori mushofusho tsoan nicayamaino David Saúl ahuun sahuuti uhuapamashta cunotinín shatuni.

⁵Asca huatan David ahuun nomuran shinanni, —iOhua! Un aca cuscacai sharama. Nocon Ifo Diosin Saúl catonni. Ascan noco yononi cuscan non nocon niaifo chaca huatiroma. Ascafia ahuun sahuuti uhuapamashta un shatua, —ishon ahuun nomuran shinanni.

⁶Ascan David a fu rafuafo yoini isca huaquin,

—Nocon Ifo Diosin man tapia un Saúl ahuun sahuuti shatuama shara icuana. Nocon Ifo Diosin Saúl catonni. Afin uhuun niaifoquin. ⁷Ascan man shinain cuscan afanan nocon niaifo rutupaitama muyamacahuun, —ishon David ato yoini.

Asca huatan Saúl quini murannoashu caincainaino ⁸Samamashta arifi quini murannoashu cani David Saúl cunani. —iUhuun niaifon, minfin uhuun niaifoquin! —ishon cunani. Ascaiton Saúl ifiacuahuan oian David maiqui fuohua ini. ⁹Ascashon David yoini,

—¿Ahuuscái min yorafo icoinra huaimun un mia chaca huapaiyai? ishon uhuunoa yoiafo. ¹⁰Minfin ointiroquin un mia rutupaiquin mia rutu cuana. Na ramashta quini muranno nocon Ifo Diosin yonoa cuscan min tapiyamaino un nannoa mia oian. Mia chaca huapaiquin un mia acuana. Uhuun yora futsafoan ua yoia, “Rutuhun,” ua huafiaifoanno un mia ahuusca huapaiquima. Un ato cumaquin isca hua, “Nocon Ifo Diosin Saúl catonnicun

uhuun niaifo un mupacunacamaran,” ishon un ato yoia. ¹¹iOinpo rai! Min sahuuti uhuapamashta un shatua. Un min sahuuti shatufiashon un mia rutuama. Natian min tapitiro un mihuunoa ahua chaca huama. Min tapitirori un tosa yoimisima, “Nocon niaifo non chaca huanon,” ishon un yoimisima. Ascafiaquin min ua funariai ua rutupaiquin. ¹²Nocon Ifo Diosin tapian un mia chaca hua iyamaraimain min ua chaca huamisiquin. Mian chaca huahuunshon nocon Ifo Diosin mia onaintimatiro uncai mia ahuusca huanacama. ¹³Nocon shunifoan yoimisifo isca huaquin, “Yora chacafoan chaca huatiroforan,” ishon yoinifo. Ascan uncai mia ahuusca huanacama.

¹⁴¿Ahuuscái min Israelifoan niaifofiashon ua rutupaifainnimun? Uncai ahuama. Pashna nacai ahua itiroma. Nanscarifiái iacai ahuama. Urificai ahuama. ¿Ahuuscái min ua funariai shafa finonmatanma ua rutupaiquin? ¹⁵Ascan nocon Ifo Diosin tapian min cayacafi shinanyamarai uncai mihuunoa chaca huama. Tsoan chaca huacun nocon Ifo Diosin onaintimatiro. Aafin uhuun numamisiquin. Ua numatiro mian rutunonma, —ishon David yoini.

¹⁶Nannori nicatan Saúl cumani isca huaquin,

—¿Uhuun facushta, David, nan minmun? —ishon yocatan Saúl fasi uaini. ¹⁷Ascan afanan Saúl yoini,

—Min sharafiano uncai sharama. Mian shara huafiano un mia chaca hua. ¹⁸Icon na shafata mian fasi shara hua. Nocon Ifo Diosin ua na quini muran nichia mian rutupaiquin rutu cuanafiashon mian rutuama. ¹⁹Tsoa futsacai mia cuscarama. Un mia chaca huamisi cuscan un futsa noicasmaquin un chaca huacun ua rutupaiquin ua rutu

cuana. Ascan mincai futsa cuscarama. Mian ahuusca huama. Min ua shara huahuunshon nocon Ifo Diosin miari shara huapainon. ²⁰Ascan natian mun tapian min chipo nocon caifo Israelifoan nocon niaifo iishquin. Min nocon niaifo icaino nantifi isharashcani. ²¹Ascan nocon Ifo Dioshuunshon ua yoihuun min niaifoaitian min uhuun yorafo non min funafo min ato rutuqui cuyoshquimaran, —ishon Saúl yoini.

²²Nannori nicatan David cumani isca huaquin, —Mian yoia cuscan nocon Ifo Diosin noco nicaino un min yorafo non min funafo rutushquimaran, —ishon yoini. Ascan Saúl ahuun pushu ano nasotan David yafi a fu rafuafoya nan aton cushuti ano fonifo.

Samuel nani cuscan

25 ¹Ascano nantian Samuel nani. Nantifi Israelifo Samuel nani anoashu ichanancanashu uainifo. Ascan nan ahuun pushu Ramá mai ano mai huanifo.

Afanan David Saúl rutupaiquin rutucuanfiashon rutunima

26 ¹Ascan chipo pushu rasi ahuun anu Zif anoashu nocofunufu pushu rasi Gabaa Saúl icano fonifo aqui chani focani. Yoiquin isca huanifo, —Nan min David funafoanfafainna natian tsoa istaipama machi ahuun anu Haquila chaimashta onuaran, —ishon yoinifo.

²Nannori nicatan Saúl tres mil ranushumuafo fasi tapicoianfo ato iyoní David achinonfo. Tsoa istaipama Zif ano fonifo. ³Machi Haquila David icano chaimashta Saúl fai cusumunri oshani. Ascafia Saúl funai aqui oaiton David tapini. ⁴Ascan ahuun yora futsafo nichini Saúl icano David tapimashquin. ⁵Ascan Saúl osha ano

yamunacucahuanaino David yafi ahuun yora futsafo funaiquimashta aqui caiton oinonfo. Ascan oianfo Saúl yafi Nerpan facu Abner nan ranushumuafoan aton niaifo nanno oshanifo. Israeli ranushumuafoan ato tarati hua. Nanfori man oshafainnifo. ⁶Ascan a fu rafuafo nan Hitita Ahimelec non Joab yora nan Sarvia ahuun facu Abisai David yocani, —¿Tsoa u fu caimun Saúl oshano u fu nocoshquin? —ishon David ato yocani.

—Un mi fu cairan, —ishon Abisai cumani. ⁷Ascan David yafi Abisai funanmanshta fonifo Saúl ahuun ranushumuafo fu icano fonifo. Funanmanshta focaquin nantifi oshai futsafo ato fuchini. Saúl oshaquin ahuun mapoquiri ahuun ashi maiqui nichia. Ranushumua niaifo Abner yafi ahuun ranushumuafoan Saulqui tarati huayacucanashu arifi oshanifo. ⁸Ascan Abisai yoini isca huaquin, —iDavid, oinpon! Natian nocon Ifo Diosin yonoa mia noicasmai min rutumatiro. Ua yoihuun un natian uhuun ashin un chachinon naanon. Un ashi curushcai tsacaquin maiya tashnihuatanon naanon. Uncai chachiqui rafu huaima. Un fusti huano nairan, —ishon fashushu Abisai yoini.

⁹Ascaiton David cumani isca huaquin, —iMa! Rutuyamahuu. Nocon Ifo Diosin Saúl nocon niaifo inon catonniquin. Non rutuashu non chaca itiro. ¹⁰Non icoinra huatiro nocon Ifo Diosin nia. Nanscarifi ai non icoinra huatiro nocon Ifo Diosin chipo Saúl onaintimaiyamaino un shinan raca chipori futsafo rutuaino arifi natiro iyamarai anifoshtashu natiro. ¹¹Nocon Ifo Diosin Saúl catonni. Nocon Ifo Diosin ua shinanmasharaino uncai Saúl rutunacama. Ascafia ahuun ashi yafi ahuun botica unu ayati non fiiain canon. Non aya ichonon, —ishon David yoini.

¹²Ascan David nan ashi yafi botica Saúl mapo chaimashta tsaoa fiini. Tsoancai fiaiton oinyamafain oshashu moinifoma. Nocon Ifo Diosin ato fasi osha chai camacoiano moitirocai inifoma. Ascaino Abisai yafi David atomaquinoashu ichonifo. ¹³Saúl yafi a fu futsafo icanoashu David yafi Abisai machi ocuma futsa mapunifo. Chaicunoashu Saúl yafi a fu icafo Davidqui nocoriscatirofo inima. ¹⁴Ascan huaiton oi ashecafinin David Nerpan facu Abner yafi ranushumua futsafo cunani isca huaquin, —iAbner, moiuhu! ¿Mian cumaimamun? —ishon cunaiton. —¿Min tsoamun? ¿Ahuuscai nocon niaifo oshafiacun min cunaimun? —ishon yocaiton.

¹⁵—¿Iconmun min ranushumua shara? Tsoan Israel icafoanno mia finontiroma. ¿Ascan ahuuscai min niaifo min cushusharama? Futsan min niaifo rutupai cafiadun mincai a cushusharama. ¹⁶Min aca cuscan sharama. Icon nocon Ifo Diosin nia cuscan iconri min non mi fu ranushumua futsafoan maton niaifo nan nocon Ifo Diosin catoanton man cushuama. Ascan man chaca huahuunoashu man natiro. ¡Oinpo! ¿Ranimun niaifoan ahuan ashi non motica ayati? —ishon machi ocuma futsa chaicushon David cunani.

¹⁷Cunaiton Saúl David ahuan oi onanni. Ascaiton cumani isca huaquin, —¿Uhuun facushta David, na minmun? —ishon cunaiton. —Unquian, uhuun niaifo min nocon niaifo. ¹⁸¿Ascan ahuuscai mian ichomashquimun? ¿Un mia ahua chaca huamun? Un ahua chaca huamainquin ua yoihuu. ¹⁹Ascan nocon niaifon unfin min oinmatiquin. Un mia yoiái cuscan ua nicasharapun. Nocon Ifo Diosin mia uhuunoa shinanchacamanaiton un nocon Ifo

Dioshuunshon un ina rutushoshquin Ifoan uhuun chaca soashonon. Ascan nocofunufaoan uhuunoa mia shinanchacamanai nocon Ifo Diosin ato onaintimacoinpainon. Mian uhuun pushu anoshon ichomana afanan uhuun yorafoyashon ichananshon nocon Ifo Diosiricai un ato futan cufintiroma. Un afanan ato futan nocon Ifo Dioshuunoa shinantiroma. Ua futsafoan yoisimisifo, “Diosi futsafo afin rami huafo cufinhuun,” ishon ua yoiáfo. ²⁰¿Unmun caifo futsafoan aton mai anoashu naashquicai? ¿Ahuuscai nocon Ifo Diosin nan mai nocon inan ano min ua imapaimamun? Uhuun caifo Israelifoan minfin nocon niaifo. Nan ia funa huaquin mian funariai. Nan nocofunun machi ano coma funatiro cuscan mian funariairan, —ishon David yoiaiton.

²¹Saúl cumani, —Unfin chaca huaquin. Uhuun facushta David, uqui nasohuun. Min uhuunoa shinansharaquifin min na shafata ua rutuamaquin. Ascan un afanan mia ahuusca huaima. Un mihuunoa shinan cuscan fasi chaca. Un fasi amaquiri shinan. Un nisofoan shinainfo cuscaran shinanmisiran, —ishon Saúl yoiaiton.

²²—Naquian min ashi. Min ranushumua pushco futsa nichihuun fiyonon. ²³Rato yoran nocon Ifo Diosin tanasharacoianfo ato shara huashoshquin. Na shafata nocon Ifo Diosin ua tapipaiquin yonoa un mia rutupaiquin rutu cuana. Nocon Ifo Diosin mia catonnicun nocon niaifo inon. Ascan un mia ahuusca huama. ²⁴Un minhuunoa shinansharaquin mia un rutupaima. Nanscarifi ai nocon Ifo Diosin uhuunoa shinansharapainon ahuafoan ua omitsiscamaiton ua numanon, —ishon David yoiaiton.

²⁵Nicatan Saúl cumani isca huaquin, —Uhuun facushta David, nocon Ifo

Diosin mia shara huashopainon. Min chipo fasi ahuarafo shara huaicai. Iconcoin min nantifi ahuara finoincairan, —ishon Saúl yoini.

Asca huatan David caino Saúl ahuun pushu ano nasoni.

28 ¹Nantian Filisteofoan aton ranushumuafo ichanannifo Israelifo rutushcaquin. (Nantianri David yafi a fu rafuafo Filisteofo fu iyopaonifo Saúl David rutunonma.) Ascan Filisteofoan aton niaifo Aquís David yoini isca huaquin,

—David, man min tapia mi fu icafo no fu cai non Israelifo rutuicaino no fu focaniran, —ishon yoiaiton.

²—Shara. Non mato fu cai. Ascan min tapitiro non mia shara huashoain cuscan, —huaiton.

Ascaiton Aquís cumani, —iAicho! Ascan min uhuun cushumisi ipatiroran, —ishon yoini.

Ainfo yoshin chacaya pushu rasi ahuun anu Endor ano Saúl aqui cani

³Nantianri Samuel nano Israelifoan fasi shinancani uainifo. Samuel cainni Ramá mai ano mai huanifo. Nanscaifoannori Saúl yononi tsoacai yoshin chacahuunoashu namisifo aton yoshin funimatiroma a fu tsainshquin. —Nan namisifo fu tsaincafocai Israeli mai ano itirofomaran, —ishon Saúl ahuun caifofo yononi.

⁴Ascan Filisteo ranushumuafoan mai futsa ahuun anu Sunem ano ichanannifo. Nantianri Saúl yafi Israeli ranushumuafoan mai futsari ahuun anu Gilboa ano ichanancani. ⁵Ascaifoan oin Saúl Filisteo ranushumuafo ichapacoin oin fasi ratucoinni. ⁶Ascatan nocon Ifo Diosi cufini ahua huatiromainquin tapishquin. Ascafiainocai nocon Ifo Diosin Saúl cumanima. Ahuun namapan yoiamafain ahuara futsafohuunoa

yoiamafain Diospan tsain yoisifoanricai Saúl tapimanima.

⁷Ascan ahuun oinmatifo yoini isca huaquin, —Ua ainfo naafo fu tsainmisi ua funashotahuun. Fuchishon nan ainfo ua yocashohuun un ahuuscatiromainquin Filisteofoan noco rutunonfoma, —ishon Saúl yoiaiton.

Ascan ahuun oinmati futsan yoini, —Niaifon, pushu rasi Endor ano ainfo naafo aton yoshin fu tsainmisi. Nanno icaran, —ishon yoini.

⁸Nicatan Saúl ahuun sahuuti nan niaifoshon sahuumisi pucashon sahuuti futsa sahuuni tsoan onanonma. Yamu nan ainfo icano nocofunu rafu fu cani. Ahuun pushu muran iquicun Saúl yoini isca huaquin,

—Un nocofunu nani fu tsainpai. ¿Ascan ahuun anu un mia yoi min ua ahuun yoshin funimashotiromun? —ishon Saúl yoiaiton.

⁹—¿Mian futsa rutumapaimun? Man min tapia nocon niaifo Saúl yononi tsoan yoshinfohuunshon yorafo tapimamisi yafi naafo fu tsainmisifori Israel mai ano itiromaran ishon noco yononi. Min ua isca huaquin yocai chipo min uhuunoa min niaifoqui chaniran, —ishon ainfoan yoiaiton.

¹⁰—Ma. Nocon Ifo Diosi nia non icoindra huatiro. Nanscarifiai min icoindra huatiro un mia yoca cuscan min ua ashocun tsoancai mia ahuusca huaima. Tsoanricai mia onaitimashquimaran, —ishon yoiaiton.

¹¹Nannori nicatan ainfoan cumani, —¿Tsoan ahuun yoshin un mia cunashotiromun? —huaiton.

—Ua Samuel cunashohuun, —ishon Saúl yoini.

¹²Ascatanaino samamashta Samuel fuchitan ainfo fasi fiiscaiton Saúl yoini isca huaquin, —iMin ua paran! iMinfin Saulquin! —ishon oi ashcafinin yoini.

¹³Ascaiton Saúl ainfo cumani,
—Ratuyamahuun. Min oiain cuscan ua
tapimahuu, —ishon Saúl yoiaiton.

—Un oian yoshin mai murannoashu
oaishafai un icaran, —ishon ainfoan
yoiaiton.

¹⁴—¿Ahuu cuscaramun na yoshin?
—ishon Saúl yocaiton. —Anifoshta tari
sahuuaran, —ishon cumani. Nicaquin
Saúl tapini nan Samuel oa. Ascaino
ahuun ointaifin maiqui
fuoshopacucahuani.

¹⁵Ascan Samuel Saúl yoini isca
huaquin, —¿Ahuuscai mian fucash
huaquin ua funimanamun? —ishon
yocaiton. —Uhuun nomuran un fasi
omitsiscai. Filisteofoan noco rutupai
fuafo. Un nocon Ifo Diosi yocapai non
ahuusca huatiromainquin. Uacai afanan
ahua yoima. Ahuun tsain
yomisihuunshon ua yoiamafain uhuun
namapan ua yoiama. Ascan un mia cuna
un atiro cuscan mian tapimanon,
—ishon Saúl yoiaiton.

¹⁶—¿Nocon Ifo Diosin natian mia
noicasmaquin mia pota ahuuscai mian
yocamun? ¹⁷Un nocon Ifo
Dioshuunshon iishqui ai cuscan mia
yoiyamua. Natian man nocon Ifo Diosin
un mia yoiyomisi cuscan man aca. Min
afanan Israeli niaifo inonma. Man mia
niaifo caimana. Min caifo futsan David
nocon Ifo Diosin catoan niaifo inon.
¹⁸Mia yonoo cuscaai min huanima.
Nocon Ifo Diosin Amalecitafoqui fasi
sinacointaqui mia yonoo, “Amalecitafo
cuyohuun,” mia huafainocai min
anima. Ascan natian nocon Ifo Diosin
mia onaintimai. ¹⁹Tsain futsari mia yoi.
Funamari nocon Ifo Diosin yonoshquai
cuscan Filisteo ranushumuafoan min
non nantifi min ranushumuafori mato
rutushquicani. Ascan funamari un icano
min facufoya un fu iiquin, —ishon
Samuel yoini.

²⁰Ascan Samuel yoini cuscan nicain
Saúl fasi ratucoin maiqui
fuopacucahuani. Nan naa shinantsa.
Nan yamu ifaita sharanon shafatari
ahua piyamai shacafuani. ²¹Ascan
ainfoan oiainno fasi Saúl ratucoinquin
yoini,

—Niaifon, mian yonoo cuscan mun
aa. Ua rutufiacuanafono mian yonoo
cuscan mun aa. ²²Ascan natian un mia
yoi ai cuscan ua nicapun. Un mia
piimashquin min afanan shaca
fuatamarocon min afanan
mutsisipacoianshu min capaiyaiquiri
min casharatiro, —ishon ainfoan yoini.

²³Ascafiaiton Saúl cumani, —Ma. Un
ahua piimaran, —ishon cumani. Ascafia
ahuun oinmatifoan yoinifo isca huaquin,
—Niaifon, na ainfoan mia yoi ai cuscan
sharaquin. Pihuun, —ishon yoirianifo.
Asca huaifoan ato nicai Saúl
funinacahuan tsaotiqui tsaoni.

²⁴Ascaiton ainfoan oinquin
samamashta moipan facu shunicoin
rutuni. Coshicoin pichafain misi
farashati maisi pichani. ²⁵Asca huatan
Saúl yafi a fu fuafo pimani. Pifaincani
nan yamu fonifo.

Saúl yafi ahuun facufo nani cuscan

31 ¹Ascan iyoconaino Filisteo
ranushumuafoan Israeli
ranushumuafo rutunancaquin
Filisteofoan shuhuinifo. Ascan Israeli
ranushumuafo ichonifo. Ichocani atirifi
Gilboa machi ano Filisteofoan ato
mufain ato rutunifo. ²Nantian
Filisteofoan Saúl furu rafi non fustiya
rutupaiquin ato mufaini. Atoqui
nococashon nan Saúl facu rafi non fusti
Jonatán non Abinadab non Malquisúa
rutunifo. ³Ascan Filisteo ranushumuafo
Saulqui noconifo fasi rutupaicani. Ascan
ichapafain nannosi piannifo. Ascaquin
futsan pia tsacamanifo. ⁴Ascan Saúl

naaquin ahuun oinmati yoini isca huaquin, —Mun nai. Na Filisteofocai nocon Ifo Diospan yorama samamashta uqui nocoaino tau huaquin ua omitsiscamafain ua rutushquin. Uncai atohuunoashu napaima. Ascan min nopun ua rutuhuu, —ishon Saúl yoini.

Ascaino ahuun oinmati fasi ratucoinquin rutunima. Ascafiaino Saúl aficoín ahuun nopo cunoquiri fosoancufoan aficoín aqui pacuashu naani. ⁵Ascaiton oin ahuun oinmati arifi nanscariai ahuun nopuqui afincoin pacuashu naani. ⁶Ascan nan shafata Saúl furu rafa non fustiya ahuun oinmati non ahuun ranushumua futsafori nannoashuri naanifo. ⁷Ascan Israelifo chaimashta machi ocuma futsa nan unu Jordán fari oaiquirinoa icafoan oiainfono aton ranushumuafu Filisteofoan rutuafo nanforifi icafoannoashu ichonifo. Ascan Filisteofoan nan Israelifo pushu rasi ano icafo aton pushufo muran iquinifo.

⁸Ascan iyoconaino Filisteofo funifo Israeli naafo ano aton ahuarafo fiishcaquin. Ascan nantian machi Gilboa

ano Saúl yafi furu rafa non fusti aton caya fuchinifo. ⁹Ascan Saúl tushtushon ahuun cuno sahuuti pucanifo. Asca huaifoan oinquín futsafo nichini Filisteofo icanoafo atoqui chaninifo Saúl man rutuafo. Aton dios ointsa afin rami huafoquiri aton pushu murannoafori ato tapimanifo. Saúl man naaran ishon ato tapimani. ¹⁰Ascan Filisteofoan aton dios anunifo Astartéran, huanifo. Ahuun pushu muran Saúl ahuun cuno sahuuti huani. Aton pushu rasi ahuun anu Bet-sán ano Saúl ahuun caya cunuqui mastanifo. ¹¹⁻¹²Ascan Israelifo pushu rasi Jabes de Galaad anoafo Filisteofoan Saúl chaca huai cuscan nicanifo. Nocofunufu ratutama yamu foshinifo Saúl yafi furu rafa non fustiton ahuun caya foshcaquin. Ascan Bet-sán ano nococashon Saúl yafi furufo ato caya cunuqui mastanifo ano fotomashon ato pushu rasi Jabes ano fonifo. Nannoshon ato coanifo. ¹³Ascashon chipo aton shafo ihui naman Jabes ano mai huanifo. Ascashon siete osha finoanno Israelifoan nannoshon piqui tununifo.